

Daxlyirlir Sul

Daxlyirlir Nixrbuxljaaxrnixrsar Zzirmar Hherggie Hher Dae

1 ¹ Yueyarjixl Yoxrdaxl goxrjia ddei zzirmar bei so koxl hal cir koxl, Babirluixr goxrjia ddei zzirmar Nixrbuxljaaxrnixrsar mel Yoxrdaxl goxrjia Yiluxlsaler zzi dax lei ci a, zzi ddei leil zaza-lili weixr gex du lei a, yaa leil ddaexr. ² Seirpor Arbosobo Yoxrdaxl goxrjia ddei zzirmar Yueyarjixl leil yar leixrga gga jia ji gger, halae Arbosobo ddei xi gga Arbosobo leil zi a sserddu zzaegu naxrcixlcixl ar mel su si lol. Yel Nixrbuxljaaxrnixrsar zzirmar ddei dder zzaegu naxrcixlcixl eilmel Sixlnaxr mermi^a yar ddei neir xi gga vei mal ci a, zzaegu naxrcixlcixl dol ggie dol ji dae a.

³ Nixrbuxljaaxrnixrsar zzirmar ddei yar leil visser su mel ddei vaer-vaerpor Yalxipirnaxr leil miardal a, Yirsaexllixl su ca mel gga zzirmar hhexr giedae ca nei vaervaerpor ar mel hier dil lei lol. ⁴ Hherdder no nr ddexr dae, i zae, olnolddu, jilixr, ciryoxr-hanga lei zza wo xie leixlsu mel nga a. Eilmel saelnei zzirmar hherggie hher dae a zzirmar leil visser cexr. Yaa leil Jialexldir ddei ddar nei sul mul gger nia. ⁵ Zzirmar ddei yoxl miardal a, yar zzor dae nei yar dda dae puxrto zzibbaer mel dax ciryoxr a bbecir-bbeni yaa leil zol yaa leil da. Yaa leil so koxl gu, so koxl mul gger, nixixl ddei bbi a dder zzirmar ddei leil miar bei gger dae lol. ⁶ Yaa ca mel gga Yoxrdaxl giedae ca Daxlyirlir, Hanaxrnixryar, Mirsalixl, Yalsarlixlyar lei ca dae. ⁷ Zzirmar ddei leil visser su mel ddei vaervaerpor ddei yoxl yaa leil mi mi box gger. Daxlyirlir leil nael Boxrtixrsasar mi gger, Hanaxrnixryar leil nael Sadaexrla mi gger, Mirsalixl leil nael Mirsaxl mi gger, Yalsarlixlyar leil nael Yalboxrnixrge mi gger.

^a1:2 Sixlnaxr mermi Sixlnaxr mermi mel dder Babirluixr goxrjia nga a. Nixrbuxljaaxrnixrsar mel Sixlnaxr mermi su a.

⁸ Nael Daxlyirlir mel zzirmar zzor dae nei dda dae mel nr zzor, nr dda, yar armael leil sei-nr-beix loxr lol nia-nr-zzir.^b Yel dder zzirmar ddei leil visser su mel ddei vaerværpor ddei leil qiuxr a armael leil sei-nr-beix nr loxr lol. ⁹ Arbosobo mel vaerværpor hal ddei leil Daxlyirlir leil perniar a seirseir meixl gger lol, zoxlnixr lol. ¹⁰ Vaerværpor eil ddei Daxlyirlir leil bbeix: “Ngo mel ngo seirpor, ngo zzirmar leil gexr. Yar mel nia azo zzor azo dda bbeix har zaxr ho a. Yar nia leil i dae a bir nia dax cir nr ter a leixlsu hal mel leil do leixl, i sol leixl arddeirnga a, arsae bei bbeixleir? Eine nga a ngo ddei olga ddei fasol.”

¹¹ Zzirmar ddei leil visser su mel ddei vaerværpor ddei ca ar ddei leil miardal a Daxlyirlir, Hanaxrnixryar, Mirsalixl, Yalsarlixlyar yaa liller leil guaxr lol. Daxlyirlir yaa leil guaxr su ddei leil bbeix: ¹² “Ni leil qiuxr, ni ni leil visser su hherdder ngua leil cei ni sixr i, ngua leil var zol nei ajjix da, ¹³ yel ni ngua leil nei zzirmar dax ciryoxr a zzor su kebal leixlsu mel leil i a, ni arsae mia mel dder ngua leil arsae bei ddo a.” ¹⁴ Yel yaa leil guaxr su ddei dder yaa leil cei ni sixr i ddarkoxl a.

¹⁵ Cei ni goxr ho a, yaa leil i dae a, yaa mel bir zzirmar dax ciryoxr a zzor su kebal leixlsu mel leil deilbe leixl, i zae leixl, ¹⁶ yel yaa leil guaxr su ddei dder yaa leil zzirmar miardal a zzor lol mel nr zzor lol, puxrto zzibbaer nr dda lol, var zzor lol lalnga a.

¹⁷ Leixlsu eil liller leil mel, Arbosobo yaa leil ciryoxr-hanga lei saexl lol, ciryoxr-hanga sul lei zza wo lol, olnolddu lol. Halae Daxlyirlir leil ciryoxr-hanga meixcir mia mel nei yixrmeix ka mel azo yilsi a saexl lol.

¹⁸ Giedae Nixrbuxljiaxrnixrsar zzirmar bbeix dae leixlsu mel leil hier dil lei nia nixixl hal ni ci a, zzirmar leil visser su mel ddei vaerværpor ddei yaa leil zzirmar ddei dax hier mal lei a. ¹⁹ Zzirmar ddei dder yaa dax ddar biar a, leixlsu mel gga arseir lei Daxlyirlir, Ha-

^b1:8 yar armael leil sei-nr-beix loxr lol nia-nr-zzir. Yar zzirmar ddei yaa leil zol mel zzor, yaa leil da mel dda arddeirnga a, yar Moxrxi ddei Lixlfaxr no nr ni a; yel dder sei-nr-beix loxr a. Lixlweixljil Sul 11 leil biar dae. Semixljil Sul 13-14 leil biar dae.

naxrnixryar, Mirsalixl nei Yalsarlixlyar yaa zzi nr zza i teixl lei a. Yel yaa leil dder zzirmar leil miar bei gger dae lol a. ²⁰ Zzirmar ddei yaa leil ciryoxr-hanga biex a dder, yaa olnoldduudu mo ddarkoxl dae mel bir neirisu nei saxrmiexrsu maelmaerjjia leil cei peix ddo leixl ggie mia a.

²¹ Julursixl^c zzirmar bei beil hal koxl zzezze lei, Daxlyirlir mel halae zzirmar hherggie hher dae seir.

Nixrbuxljiaxrnixrsar Zzirmar Yixrmeix Ka

2 ¹ Nixrbuxljiaxrnixrsar zzirmar bei nr koxl ddei hal cir koxl, yar yixrmeix ka a, nixmox zzar^d lei zzilzzil-zzerzzer mo yixrmeixl lei jjiu nr ddo. ² Yar dder ca leil miardal a, neirisu, saxrmiexrsu, neirbeisu, nei Jialexldir su ca mel leil ae si lei lol, yaa leil yar azo yixrmeix ka a bbeix gger lol. Yaa dder lei a, yar xilmeir ngier dae a. ³ Zzirmar ddei dder yaa leil bbeix: “Ngo yixrmeix ar ddeir ka a, nixmox zzar^e lei zzilzzil-zzerzzer mo, yel ngo yixrmeix ka dae ddei azo yixrmeix a saexl niazzir.”

⁴ Jialexldir su ca mel dder Yallaxr ddar sser a yar leil ddarkoxl a bbeix: “Zzirmar, ni leil cirse-cirsil gol dae lol nia. Ni leil qie, ni yixrmeix ka dae ddei ngua leil biar gger la! Yel ngua dder azo yilsu a ni leil biar gger cexr.” ⁵ Zzirmar ddei yaa leil ddarkoxl a bbeix: “Ngo xiar har ho a. Nia ngo yixrmeix ka dae ddei bbeix teixl nr gger lei nei azo yilsu a ngo leil biar nr gger arddeirnga a, ngo dder nia leil cirpi-cirpi taexl zil gger nia,^f halae nia ddei xi mel bei xiaxr gger a cirbelde loxr lol nia. ⁶ Nia ngo leil bbeix teixl gger lei arddeirnga a nael, ngo nia leil naxrcixlcixlmo hal mel cirke gger, halae ngo lei nia

^c1:21 Julursixl Julursixl zzirmar mel dder Mardaexl Bosi goxrjia ddei zzirmar. Nixrbuxljiaxrnixrsar mel dder Babirluixr goxrjia ddei zzirmar. Nixrbuxljiaxrnixrsar zzirmar si ho a, Mardaexl Bosi su ca mel Babirluixr su ca mel leil deil leixl gger a, yaa dder Babirluixr goxrjia ddei leil guaxr dae a. Daxlyirlir Sul 5:30-31 leil i.

^d2:1 nixmox zzar Xiboxrlaexr ddar bbeix ‘yar ddei xiu’ eine bbeix.

^e2:3 nixmox zzar Xiboxrlaexr ddar bbeix ‘xiu’ eine bbeix.

^f2:5 cirpi-cirpi taexl zil gger nia Yilsu mel dder hoba qihher leixrhher taexl teixl gger, saelnei oldde taexl teixl gger a no zil lol.

leil yarzisael i du. Yel eilcar nia ngo yixrmeix ka dae ddei nei azo yilsi a ngo leil bbeix gger nia.”

⁷ Yaa nr boxl ddei zzirmar ddei leil bbeix: “Zzirmar, ni leil qie, ni yixrmeix ka dae ddei ngua leil biar gger la! Yel ngua dder arddol-yox yilsi a ni leil biar gger cexr.” ⁸ Zzirmar ddei ddarkoxl a bbeix: “Nia mel ngo arsaе bei xiar har ho a saexl a dder dexryixl hha dae arddeir a, ngo saexl mar. ⁹ Nia zzibbe har ho a ddarjia te a ngo leil fur dae a, ngo bbeix dae ddei gierbox lol niazzir. Nia ngo leil bbeix teixl gger lei nia, yel ngo dder nia ngo leil bbeix teixl gger lei xie saexl a. Nrnga a ngo dder nia leil cirpi-cirpi taexl zil gger, halae nia ddei xi mel bei xiaxr gger a cirbelde loxr lol lalnga a.”

¹⁰ Jialexldir su ca mel zzirmar ddei leil ddarkoxl a bbeix: “Zeixleixr lei yarzi middux, yarzi sexr zzirmar arddol ddei neirisu, neirbeisu, Jialexldir su ca mel leil eine biex nr seix, yel middurbbor ca mel arseir lei zzirmar ni biex dae mel bbeix teixl lei nr xie. ¹¹ Zzirmar ni biex dae mel yarzi ddarkoxl sol; arseir lei ni leil ddarkoxl teixl lei nr xie. Arbosobo lar ni leil ddarkoxl teixl lei xie, nael yar ca dax cirgo a nr hher dae.”

¹² Yel zzirmar ddei dder seifu faex zildu a ca leil miardal a Babir-luixr goxrjia gga ciryoxr-hanga saexl su hazza leil seixl zil gger lol.

¹³ Yel zzirmar ddei dder miardal teixl a, ciryoxr-hanga saexl su hazza leil seixl ssi lol. Ca mel dder Daxlyirlir nei yar carbeix mel leil zo a yaa leil seixl niazzir dae a.

¹⁴ Zzirmar leil meixr guaxr gger su vaervaerpor⁹ Yalluxl dder ddux lei a, Babirluixr goxrjia gga ciryoxr-hanga saexl su mel leil seixl lei. Yel Daxlyirlir olnoldduddu mo zaza sael Yalluxl leil biex a bbeix: ¹⁵ “Zzirmar ddei arsaenga a eine larhor arddeir miardal teixl lei leir?” Yel Yalluxl dder arsaе lerler nga yar leil biar gger a. ¹⁶ Daxlyirlir zzirmar ddei dax ssi a yar leil qiuxr a nixixl dozil nr ni sael gger lol a, yar dder zzirmar yixrmeix ka dae ddei arddolyoxl yilsi a zzirmar leil bbeix teixl gger lei xie.

⁹2:14 Zzirmar leil meixr guaxr gger su vaervaerpor Yar mel zzirmar dax mae dae a ca mel leil zzirmar leil nr deil lol nr seixl lol.

¹⁷ Daxlyirlir yar hherggie jjixr ci a, yar carbeix Hanaxrnixryar, Mirsalixl, Yalsarlixlyar yaa leil bbeix gger a, ¹⁸ yaa leil merlabbor hher dae Arboso leil qiuxr a yaa leil zoxlnixr lol, yel arseir lei nr saexl eilmel yaa leil saexl lol. Nrnga a Daxlyirlir nei yar ddei carbeix halae Babirluixr zzi gga ciryoxr-hanga saexl su kebal hal mel lei cirgo a si var. ¹⁹ Eilmerxixl ci a arseir lei nr saexl eilmel Arboso dder Daxlyirlir leil meixcir mia lol a. Daxlyirlir dder merlabbor hher dae Arboso leil bbeixzae gger a ²⁰ bbeix:

“Arbosobo leil mel merlo-milo coxl cirdae a
arddolcar ci a lei bbeixzae gger nia.

Olnoldduddu mo hal mel nei ddoddomo hal mel mel
Arbosobo ddei a.

²¹ Yar cir koxl ceinir xiu, nixixl nei jiax mel leil gierbox.^h

Yar zzirmar ddei leil zzirmar nr bei lol.

Yar zzirmar bei lol niazzir ddei leil zzirmar bei lol.

Yar olnolddu su ca mel leil olnolddu lol,
yar jilixr su ca mel leil jilixr lol.ⁱ

²² Yar arseir lei nr saexl hal mel nei kerzi dae hal mel
ca leil saexl lol.

Yar neixmar ggie maelmaerjjia lei saexl,
bbelele ddei lei yar dax hher ji dae.

²³ Ngo porpor ddei Arboso,

ni ngo leil olnolddu lol,

ddoddomo bei var lol,

ngua ni dax qiuxr dae mel,

eilcar ni ngo leil ddarkoxl,

zzirmar arsae yixrmeix ka dae mel,

ni ngua leil saexl lol a,

^h2:21 Yar cir koxl ceinir xiu, nixixl nei jiax mel leil gierbox. Ddar eil qir ddei yilsi mel dder middurbbor arsae lerler nga var maelmaerjjia Arboso guaxr dae.

ⁱ2:21 yar olnolddu su ca mel leil olnolddu lol, yar jilixr su ca mel leil jilixr lol Ddar eil qir ddei yilsi mel dder Arboso ca mel leil olnolddu lol nei jilixr lol bbeix arddeir a.

ngo ni leil nawo; ni leil bbeixzae gger,”

eine bbeix a.

Daxlyirlir Zzirmar Ddei Leil Yixrmeix Ka Dae Mel Biar Gger

²⁴ Yel Daxlyirlir dder Yalluxl dax ssi. Yar mel dder zzirmar ddei miardal teixl lei a Babirluixr mermi gga ciryoxr-hanga saexl su mel leil seixl lei su ddei nga a. Daxlyirlir yar leil bbeix: “Babirluixr mermi gga ciryoxr-hanga saexl su mel leil tor nr seixl. Ni ngo leil hier dae a zzirmar ddei dax ssi. Ngo yar yixrmeix ka dae ddei arddolyox yilsa a yar leil biar gger nia.”

²⁵ Yalluxl dder nialngasael Daxlyirlir leil zzirmar ddei dax hier mal a, zzirmar ddei leil bbeix: “Ssu si lei Yoxrdaxl su ca mel gga ngo ca ar ddeir pex dae a. Yar ni yixrmeix ka dae ddei arddolyox yilsa a ni leil biar gger var zzor.” ²⁶ Zzirmar ddei Daxlyirlir hherdder Boxr-tixrsasar leil bbeix: “Ni ngo yixrmeix ka dae ddei nei yixrmeix ddei azo yilsa a ngo leil biar gger var bbaex?” ²⁷ Daxlyirlir dder yar leil ddarkoxl a bbeix: “Zzirmar, ni biex dae a ca mel nr saexl hal mel, ciryoxr-hanga saexl su, saxrmiexrsu, neirisu nei gieisu^j mel lei ni leil bbeix teixl gger lei nr xie. ²⁸ Merlabbor hher dae Arbosobo ddei larnei ca mel nr saexl eilmel ca leil saexl lol cexr. Eilni-arggeni arsae lerler nga var mel yar ni leil saexl lol a. Ni yixrgguci leil yixrmeix ka dae ddei nei meixcir mia mel eine a:

²⁹ Zzirmar, ni yixrmeixl jjiu dae car eilni-arggeni arsae nga var hal mel leil mia ho a. Arbosobo ni leil ca mel nr saexl hal mel saexl lol a. ³⁰ Yar ca mel nr saexl eilmel ngo leil saexl lol a mel, ngo bir kebal ca mel leil olnolddu leixl nr nga, ni leil ni yixrmeix ka dae mel arddolyox yilsa a nei ni nixmox zzar xiar dae mel saexl lol arddeir a.

³¹ Zzirmar, ni meixcir mia a, bbex vaervaermo ar ddei mia a. Bbex eil ddei yarzi mu, yarzi bbo, ni xilmeir ngier dae, i dae a yarzi gexr-

^j2:27 gieisu Gieisu eilmel mel yixrmeix ka a arsae lerler nga var saexl. Yaa yoxl gie mel leil i a arddolcar arsae lerler nga var lei saexl. Halleix gieisu cirmelmel seir, cirmelmel nael jiuxr.

ddo. ³² Bbex oldde taex nael sae lillil a bei teixl lei, nixmoxzo nei leixrhher nael piu bei teixl lei, xilbe zzoxrbbeix nei pirzei do nael zzir bei teixl lei, ³³ ggorbaesaer zixl nael he bei teixl lei, qihher zze nael he lor nilnaexl lor cirgo a bei teixl lei. ³⁴ Ni i dae car, ca giexl teixl lei nr nga legelbbe ar taex a he lor nilnaexl lor cirgo a bei teixl lei qihher zze leil zax gex dae a, qihher zze zax me gger a. ³⁵ Yel he, nilnaexl, zzir, piu, sae maelmaerjjia zax me gger a, gielcozi ggieddei gga paer mel sael a mersi jia du si a. Zo lei zo wo nr ddo a. Nael bbex ddei leil zax xiaxr gger legelbbe hal taex worga vaervaermo ar ga loxr a, mer woxrke cirmaex-hanga lei hher bbi a.

³⁶ Eilmel mel dder ni yixrmeix ka dae ddei nga a. Eilcar ngua ni dax ni yixrmeix ka dae ddei azo yilsi a biar nia. ³⁷ Zzirmar, ni mel dder zzirmar mel ddei zzirmar ddei nga a. Merlabbor hher dae Arbosobo mel goxrjia mel ni leil guaxr lol; ni leil quexrlixl zza lol, bbesur zza lol; halae ca mel ni leil i du lol. ³⁸ Yar middurbbor hher dae ca,^k mi-paerbbae gga hher dae yirvu-nilhax, merlabbor bbiu dae ngaxssor-ngaxne, hazza lei ni leixrga gga jia ji gger ho a. Ni leil hazza leil guaxr lol. Ni mel dder sae bei teixl lei bbex oldde taex nga a. ³⁹ Ni giedae goxrjia ar ddeir ddux lei nia, nael ni zzi nr zza. Yoxl goxrjia soler ddei ddux lei nia, hherdder zzir ddei nga a; middurbbor maelmaerjjia leil guaxr. ⁴⁰ Goxrjia liller ddei ddux lei a, he sael a gex. He mel azo lei deil xiaxr gger xie, azo lei nixlme gger xie. Goxrjia eil ddei lei yar xilmeir leil zza dae goxrjia mel leil deil leixl gger xie. ⁴¹ Ni mia bbex hal ddei ddei qihher nei cini mel he lor nilnaexl lor cirgo a bei teixl lei sael goxrjia hal ddei zzi dax bei tor nr xie. He nei nilnaexl mel ggiex xiux dae mel sael a goxrjia hal ddei lei he sael a gex. ⁴² Cini mel he lor nilnaexl lor cirgo a bei teixl lei sael a goxrjia hal ddei cirmelmel a nael sexr, cirmelmel a nael nr sexr. ⁴³ Ni nilnaexl nei he ggiex xiux ggie mia mel sael a nga, goxrjia hal ddei gga hormo cuxr ca lei goxr dae. He nei nilnaexl cirgo a ggiex xiux nr cexr sael a nga, yaa zzi dax toltor a nga nr var. ⁴⁴ Zzirmar eilmel halae goxrjia eilmel leil guaxr dae seir car, merlabbor hher

^k2:38 middurbbor hher dae ca Xiboxrlaexr ddar bbeix: “ca ddei ssor mel”. Yilsi mel dder middurbbor hher dae ca mel nga a.

dae Arbosobo goxrjia ar ddeir ddux lei lol nia.^l Goxrjia eil ddei leil mel cirse-cirsil lei deil leixl su nr zza. Kebal ca mel leil lei nr guaxr lol. Goxrjia eil ddei halae kebal goxrjia hazza leil deil leixl gger a mier lol. Goxrjia eil ddei nael cirse-cirsil lei zza dae var.⁴⁵ Ca giexl teixl lei nr nga legelbbe ar taex a worga gga ddux lei a, sae, piu, zzir, he, nilnaexl maelmaerjjia leil zax me gger ggie ni mia a.^m Eil-mel mel dder ddo zzir Arbosobo ni leil arddolcar arsae lerler nga var hal mel bbeix gger arddeir a. Ni yixrmeix ka dae ddei mel yarzi a. Ngua ni leil azo yilsa a biar gger dae mel ddarzziddo.”

Zzirmar Ddei Daxlyirlir Leil I Du

⁴⁶ Halcar Nixrbuxljiaxrnixrsar zzirmar dder middur ddei leil puxr gex dae a Daxlyirlir leil olddetexl, halae ca leil miardal a yar leil zilabox nei nerxiuxiu hal mel gger lol. ⁴⁷ Zzirmar ddei dder Daxlyirlir leil bbeix: “Ni arseir lei nr saexl eilmel saexl a mel, nia ddei Arbosobo ddei mel yarzi vaer zzir Arbosobo ddei nga a;ⁿ zzirmar mel ddei Seirpor ddei nga a; arseir lei nr saexl hal mel ca leil saexl lol su ddei nga a.” ⁴⁸ Yel zzirmar ddei Daxlyirlir leil i du, yar leil zzaegu naxrcixlcixl cirke gger, yar leil Babirluixr mermi maelmaerjjia guaxr lol, yoxl yar leil vaerzzirpor bei lol a, Babirluixr mermi ciryoxr-hanga saexl su hazza leil guaxr lol. ⁴⁹ Daxlyirlir zzirmar ddei leil qiuxr a, zzirmar ddei dder Sadaexrla, Mirsaxl, Yalboxrnixrge yaa leil Babirluixr mermi ddei cirza-hanga guaxr lol. Daxlyirlir nael zzirmar hherggie hher dae a miar bei.

^l2:44 Arbosobo goxrjia ar ddeir ddux lei lol nia Qihher zze leil zax gger dae legelbbe hal taex mel dder Arbosobo ddux lei lol goxrjia ddei nga a.

^m2:45 Ddar eil qir ddei yilsa mel dder goxrjia maelele ddei kebal goxrjia hazza leil deil leixl gger.

ⁿ2:47 Arbosobo ddei mel yarzi vaer zzir Arbosobo ddei nga a Yar neir maelmaerjjia leil guaxr.

Nixrbuxljiaxrnixrsar Zzirmar Ddei Miardal A
Sae Bei Teixl Lei Bbex Te Leil Zi Lol

3¹ Nixrbuxljiaxrnixrsar zzirmar sae sser a bbex ar te bei a, Babir-luixr mermi gga bbaelerler ggie Duxlla ae halmaex ngier dae lol. Bbex eil te mel muggiebbæaer nael 27 gocixr zza, kuaxggiebbæaer nael 3 gocixr zza.^o² Zzirmar ddei ca leil miardal a, serzar, zezar, xixlzar, xiazar, vaervaerpor dax cirza-hanga zzibbe su mel, zzirbae guaxr su mel, ca leil ser su mel, nei Babirluixr mermi kebal vaervaerpor mel leil ae si lei lol a, yar ddei bbex te leil zi beil lei lol. ³ Yel vaervaerpor eilmel dder lei a, cirter a Nixrbuxljiaxrnixrsar zzirmar ddei bbex te xilmeir ngier dae a. ⁴ Halcar malmal, zzirmar ddei ddar mel ca leil bbeix gger su ddei worcixl-worni ae du lei a bbeix: “Cirgoxr-hanga, circuxr-hanga, cirza-hanga ddar te su ca mel, zzirmar nia leil miardal a bbeix: ⁵ Nia cuxgexdaex, mexlur, pexniaxl mex dae nei bbaexlabox mel bbaex dae, ggalabox mel gga dae, halae cirza-hanga yoxrcixl mel leil bbejjiur a mel dder middur ddei leil puxr gex dae a Nixrbuxljiaxrnixrsar zzirmar sae sser a bei teixl lei bbex ngier dae lol ddei leil olddetextl nia. ⁶ Arseir middur ddei leil puxr gex dae a oldde-nr-textl arddeirnga a mel, halcar malmal dder yar leil adoxl herhelher bbiu dae ngieryoddur gga piar ji gger nia.” ⁷ Yel cirgoxr-hanga, circuxr-hanga nei cirza-hanga ddar te su ca mel ha mex dae, bbaex dae, gga dae, ciryoxr-hanga yoxrcixl mel leil bbejjiur a qie dder middur ddei leil puxr gex dae a, Nixrbuxljiaxrnixrsar zzirmar sae sser a bei teixl lei bbex te leil olddetextl a.

Ca Mel Daxlyirlir Ddei Gaxggor Carbeix Soler leil Goxl

⁸ Halcar malmal, Jialexldir su ca nrnelsael a Yoxrdaxl su ca mel leil goxl lei. ⁹ Yaa zzirmar ddei leil bbeix: “Zzirmar, ni leil cirse-cirsil gol dae lol nia! ¹⁰ Zzirmar, ni miardal goxr a bbeix, cuxgexdaex, mexlur, pexniaxl mex dae nei bbaexlabox mel bbaex dae, ggalabox mel

^o3:1 muggiebbæaer nael 27 gocixr zza, kuaxggiebbæaer nael 3 gocixr zza 27 gocixr mel dder 60 zer. 3 gocixr mel dder 6 zer. 1 zer mel dder leixrzixlgex cirdae a leixrni zzezze.

gga dae halae cirza-hanga yoxrcixl mel leil bbejjiur su mel dder middur ddei leil puxr gex dae a sae bei teixl lei bbex ddei leil olddetextl nia. ¹¹ Ha arseir middur ddei leil puxr gex dae a oldde-nr-textl arddeirnga a mel, yar leil dder adoxl herhelher bbiu dae ngieryoddur ddei gga piar ji gger nia. ¹² Nael zzirmar, Yoxrdaxl su ca nrnelsael a mel ni leil meixddur ga gga lei nr ddir, ni zi dae ddei leil vi-nr-sser, halae ni sae sser a bei teixl lei bbex ddei leil lei oldde-nr-textl. Ca eil nrnelsael mel dder ni yaa leil miardal a Babirluixr mermi gga miar guaxr su Sadaexrla, Mirsaxl, nei Yalboxrnixrge yaa nga a.”

¹³ Zzirmar ddei dder seifu faex zildu a ca leil miardal a, Sadaexrla, Mirsaxl nei Yalboxrnixrge yaa soler leil yar dax hier mal lei lol. Yaa leil dder zzirmar dax hier mal ci a. ¹⁴ Zzirmar ddei yaa leil biex a bbeix: “Sadaexrla, Mirsaxl, Yalboxrnixrge, nia ngo zi dae ddei leil vi-nr-sser, ngo sae sser a bei teixl lei bbex ddei leil lei oldde-nr-textl a ngo? ¹⁵ Eilcar nia bei har zaxr dae a zeixleixr cuxgexdaex, mexlur, pexniaxl mex dae nei bbaexlabox mel bbaex dae, ggalabox mel gga dae halae cirza-hanga yoxrcixl mel leil bbejjiur a, middur ddei leil puxr gex dae a ngo bei teixl lei bbex ddei leil olddetextl arddeirnga a nael, nia dder nr zzi a. Oldde nr textl arddeirnga a nael, nia leil cirleixr dder adoxl herhelher bbiu dae ngieryoddur ddei gga piar ji gger nia. Arseir nia leil ngo leixrga gga jiuxl teixl xie neil?”

¹⁶ Nael yaa ddarkoxl a bbeix: “Zzirmar, ni bbeix dae mel ngua ni leil ddarkoxl nr ssa. ¹⁷ Hherdder eine nga zzorbbeixlei, ngua visser dae Arbosobo ddei mel ngua leil adoxl herhelher bbiu dae ngieryoddur ddei gga jiuxl teixl lei xie, ni leixrga gga lei jiuxl teixl lei xie. ¹⁸ Hherdder eine nr nga zzorbbeixlei, ni saexl nia, ngua arsaebeilei ni zi dae ddei leil visser nr var, ni sae sser a bei teixl lei bbex ngier dae lol ddei leil lei oldde-nr-textl.”

Daxlyirlir Ddei Gaxggor Carbeix Soler Leil Ngieriyoddur Gga Piar Ji Gger

¹⁹ Zzirmar ddei dder Sadaexrla, Mirsaxl, Yalboxrnixrge yaa leil sirzzi zildu a hoxrseixl lei bixl jjia a; yar ca leil miardal a ngieryoddur ddei cu taxl lol a bir zoxlzoxl leil sir peix taxl leixl lol. ²⁰ Yoxl

yar ddei meixr mel gga yarzi sexr hal mel leil miardal a, yaa soler leil neixl gex du lei a adoxl herhelher bbiu dae ngieryoddur ddei gga piar ji gger lol. ²¹ Meixr mel dder ca eil soler leil neixl gex du lei a, adoxl herhelher bbiur dae ngieryoddur ddei gga piar ji gger a. Ca eil soler teixlsibbor pia veixr dae, kukurzzar pia veixr dae, lulda-ddur veixr dae, halae oltex neixl dae. ²² Zzirmar ddei mel jiurjiur-maemae miardal, adoxl ddei yoxl yarzisael vaer, yel yaa leil bil dil su ca mel leil cu zil gger a. ²³ Yaa soler leil nael neixl gex dae a, adoxl gga de ji dae a.

²⁴ Zzirmar ddei dder murgur zildu a jiurjiur-maemae ha du lei a, yar dax cirza-hanga zzibbe su mel leil biex a bbeix: “Niul neixl gex du lei a adoxl gga piar ji gger ca mel doxl soler a nga zzarmar?” Yaa ddarkoxl a bbeix: “Zzirmar, nga a mar.” ²⁵ Zzirmar ddei bbeix: “Nia i lar! Ngo ca liller mia a. Yaa leil neixl lei neixl nr gex dae, yaa adoxl ddei gga ssicixl-ssige ssi dae, halae yaa leil cirdoxr lei cu nr dae. Yaa soler dax ca dae hal ddei leil i dae a mel Arbosobo ddei ssor ddei leisel.”

Yaa Soler Leil Piur Teixl Lei A Quexrlixl Zza Dax Lol

²⁶ Yel zzirmar ddei adoxl herhelher bbiur dae ngieryoddur alddur ddei dax ssi naer lei a bbeix: “Mu zzir ggie hher dae Arbosobo leil visser su Sadaexrla, Mirsaxl, Yalboxrnixrge, nia ddux lei a ngo dax eilmaex lei.” Eine bbeix a yaa soler dder adoxl gga ddux lei a. ²⁷ Yel serzar, zezar, xixlzar, nei zzirmar dax cirza-hanga zzibbe su mel cirgo a pex mal lei a ca eil soler leil i lei. Yaa mel ca eil soler ggecir leil mel adoxl cu dae nr xie, olce lei bax ar ba cu nr zixl, pia mel lei cirdoxr lei cu nr xiaxr mia a; halae adoxl cu goxr lei bax ardoxr bbeir-nr-ne. ²⁸ Zzirmar ddei bbeix: “Sadaexrla, Mirsaxl, Yalboxrnixrge ddei Arbosobo ddei leil mel bbeixzae gger nia. Yar, yar ddei tisir mel leil miardal a, yar leil koxl a yar leil visser su ca mel leil jiuxl lol. Yaa ngo miardal dae mel no nr ni, yaa ddei olga ddei nr li lei ddo, yaa ddei Arbosobo leil lar zi, kebal hal mel leil zi nr yuex. ²⁹ Arseir zi dae ddei lei Arbosobo sael a ca leil eine jiuxl nr var, yel eilboxl ngo miardal, arddol goxr, arddol cuxr, arddolyox ddar te

su ca mel nga zzorbbeixlei, ha arseir Sadaexrla, Mirsaxl, Yalboxr-nixrge ddei Arbosobo leil bbeix vuxryixr arddeirnga a mel, yar leil cirpi-cirpi taexl zil gger nia, yar ddei ake mel bei xiaxr gger a cirbelde loxr lol nia,” eine bbeix a. ³⁰Yel zzirmar ddei dder yaa leil Babirluixr mermi gga bir halleix leil quexrlixl zza lol a.

Nixrbuxljiaxrnixrsar Zzirmar Yixrmeix Nrnel Ddei Ka

4 ¹Nixrbuxljiaxrnixrsar zzirmar ddei mel mer woxrke cirgoxr-hanga, circuxr-hanga nei cirza-hanga ddar te dae ca mel leil bbeix: “Nia leil nixmox zzaso dax lol nia! ²Mu zzir ggie hher dae Arbosobo ngo dax ddoddomo murgurgurmo bei dae mel ngo ggesese a ca leil biar gger yuex.

³Yar ddoddomo bei dae hal mel yarzi vaer,
arseir lei bei nr var;
yar murgurgurmo bei dae hal mel yarzi sexr,
arseir lei xiar ci nr xie.
Yar ddei goxr ddei arddolcar ci a lei zza dae;
yar middurbbor ca cirzeix-hanga leil guaxr.

⁴Ngo sosarsar arla ngo hherggie xi gga hher dae a, nixixl yarzi goxr seir goxr dae. ⁵Ngo yixrmeix ar ddei ka a, ngo leil gexr lol. Ngo yixrgguci ddei leil yixr dae a xiar dae mel nei ngo meixcir mia mel ngo leil ssilssil-ssurssur zza lol. ⁶Yel ngo miardal a, Babirluixr mermi gga ciryoxr-hanga saexl su ca maelmaerjjia leil ngo dax lei lol a, yaa leil ngo yixrmeix ka dae ddei azo yilsa a bbeix gger lol. ⁷Yel neirisu, saxrmiexrsu, Jialexldir su nei gieisu ca maelmaerjjia lei a, ngo, ngo yixrmeix ka dae ddei yaa leil bbeix gger a. Nael yaa ngo leil azo yilsa a bbeix teixl gger lei nr xie. ⁸Giedae Daxlyirlir lei a. Yar leil mel ngo zi dae ddei dax zoxr dae a, Boxrtixrsasar lei mi. Yar dax mel seirceix-seirmaer Arbosobo ddei Xiu ddei hher ji dae. Yel ngo yixrmeix ka dae ddei yar leil bbeix gger a bbeix:

⁹Ciryoxr-hanga saexl su mel ddei vaervaerpor Boxrtixrsasar, ngo saexl, seirceix-seirmaer Arbosobo ddei Xiu ddei mel ni dax hher ji

dae, ca mel nr saexl mel lei ni saexl. Yel ngo yixrmeix ka a meixcir mia mel azo yilsi a ni ngo leil bbeix gger nia. ¹⁰ Ngo yixrgguci leil yixr dae a, meixcir mia mel eine a:

Ngo middurbbor sixzzei yarzi mu ar zzei ner dae ggie mia a. ¹¹ Sixzzei hal zzei ner vaer du lei a; halae yarzi ner gex ver, mu-ggiebbaer mel merlabbor lei ddeix ci a. Mer woxrke arddolmaex hher dae lei mia ddo. ¹² Seixlpeixl mel yarzi igax zae, saer mel yarzi niar bex; gol dae maelmaerjjia ddei zzorddu bei cexr. Middurbbor yirvu-nilhax mel yar woxrke avixsaer ggie wornol dae, merlabbor bbiu dae ngax mel lei yarcaxlleixr mel leil cide bei lei; ha gol dae maelmaerjjia saer eil zzei leil zzor.

¹³ Ngo yixrgguci leil yixr dae a, meixcir mia car, Arbosobo ddei cassor-worssor mel leil guaxr su seirceix-seirmaer tisir ar ddei a merlabbor zei lei ggie mia a. ¹⁴ Yar worcixl-worni ae dae a bbeix: ‘sixzzei eil zzei taexl zei gger ssi, yarbaxlleixr mel taexl pixl gger ssi, seixlpeixl mel caex pixl gger ssi, saer mel piar pixl gger ssi, sixzzei woxrke hher dae yirvu-nilhax mel leil pa du si lol, yarbaxlleixr leil nor dae ngax mel leil bbiu du si lol. ¹⁵ Sixngexlbbex cirdae a sixjibbei zzeze nael ner dae lol nia, he queli nei zzir queli sser a, sixngexlbbex ddei leil gu gex dae nia, silbbar mel dax cirgo a mipaerbbae gga ner dae lol. Yar leil mipaerbbae gga hher dae lol a yirvu-nilhax mel dax cirgo a silbbar zzor lol nia, halae merlabbor zil ddar zei lei a yar leil ddar vicir lol nia. ¹⁶ Yar nixmox taex gierbox lol nia, yel ca ddei nixmox zzi nr zza lol, yirvu-nilhax nixmox ar taex loxr lol.^p Eine sir koxl goxr lol nia. ¹⁷ Arbosobo ddei cassor-worssor mel leil guaxr su seirceix-seirmaer tisir mel Arbosobo miardal dae eil ddei middurbbor ca mel leil bbeix gger. Yel yaa leil Muzzirggie Hher Dae Arbosobo mel middurbbor goxrjia mel leil guaxr, yar goxrjia ddei arseir leil guaxr lol niazzir mel dder arseir leil guaxr lol, arseir lei i-nr-du ca mel leil lei goxrjia ddei guaxr lol, eilmel saexl lol.’ ”

^p4:16 Yar nixmox taex gierbox lol nia, yel ca ddei nixmox zzi nr zza lol, yirvu-nilhax nixmox ar taex loxr lol. Ddar eil qir ddei yilsi mel dder yar tae a.

¹⁸ Nixrbuxljiaxrnixrsar zzirmar ddei yoxl bbeix: “Boxrtixrsasar, eil ddei mel dder ngo yixrmeix ka dae ddei nga a. Ngo ddei goxrjia gga ciryoxr-hanga saexl su ca maelmaerjjia lei ngo yixrmeix ka dae ddei azo yilsa a bbeix teixl gger lei nr xie. Seirceix-seirmaer Arbosobo ddei Xiu ddei mel ni dax hher ji dae a, ni lar bbeix teixl lei xie. Yel ni ngo leil azo yilsa a bbeix gger nia.”

Daxlyirlir Yixrmeix Ddei Azo Yilsa A Biar

¹⁹ Daxlyirlir, hherdder Boxrtixrsasar, eilmel leil bbejjiur a nixmox zzar zzilzzil-zzerzzer mo arleixr zza a; yar mur zzae murgur gexr zzae gexr. Zzirmar ddei bbeix: “Boxrtixrsasar, ni ngo yixrmeix ka dae ddei leil nei ngo yixrmeix ka dae ddei yilsa mel leil gexr nr ssa.” Boxrtixrsasar ddarkoxl a bbeix: “Ngo ddei seirpor, ni yixrmeix ka dae mel ni leil vuxryixr su ca mel leil ddeix lol nia, yixrmeix ka dae ddei yilsa mel ni leil dir su ca mel leil ddeix lol nia.

²⁰ Ni mia sixzzei hal zzei ho ner ho vaer, halae yarzi ner gex ver, muggiebbae mel merlabbor lei ddeix ci a; mer woxrke arddolmaex hher dae lei mia ddo. ²¹ Seixlpeixl mel yarzi igax zae, saer mel yarzi niar bex, gol dae maelmaerjjia ddei zzorddu bei cexr. Middurbbor yirvu-nilhax mel yar woxrke avixsaer ggie hher dae, merlabbor bbiu dae ngax mel lei yarcaxlleixr mel leil cide bei lei.

²² Zzirmar, sixzzei ho ner ho vaer, yarzi ner gex ver eil zzei mel dder ni nga a. Ni yarzi sexr. Ni ddei quexrlixl mel yarzi vaer. Ni ho bei ho sexr a merlabbor lei ddeix ci sael a nga, ni ddei quexrlixl mel ho bei ho vaer a mer woxrke cirmaex-hanga lei ni guaxr. ²³ Zzirmar, ni Arbosobo ddei cassor-worssor mel leil guaxr su seirceix-seirmaer tisir ar ddei a merlabbor zei lei ggie mia a. Tisir ddei bbeix: ‘Sixzzei eil zzei taexl zei gger a bei xiaxr gger ssi, sixngexlbbex cirdae a sixjibbei zzezze nael ner dae lol nia, he quelu nei zzir quelu sser a, sixngexlbbex ddei leil gu gex dae nia, silbbar mel dax cirgo a mipaerbbae gga ner dae lol nia. Yar leil mipaerbbae gga hher dae lol a yirvu-nilhax mel dax cirgo a silbbar zzor lol nia, ha-

lae merlabbor zil ddar zei lei a yar leil ddar vicir lol nia. Eine sir koxl goxr nia,' eine bbeix a.

²⁴ Ngo ddei zzirmar, ngo ddei seirpor, ni leil nga var eilmel mel Muzzirggie Hher Dae Arbosobo ddei miardal arddeir a. Ni yixrmeix ka dae ddei yilsil mel dder eine a:

²⁵ Ni leil mel ca mel dax nr hher lol ggaxr teixl gger a mipaerbbae gga yirvu-nilhax mel dax cirgo a goxr nia. Ni mel niur sael a silbbar zzor nia, merlabbor zil ddar zei lei a, ni leil ddar vicir lol nia. Eine sir koxl goxr nia, hherdder Muzzirggie Hher Dae Arbosobo ddei mel middurbbor goxrjia mel leil guaxr, yar goxrjia ddei arseir leil guaxr lol niazzer mel dder arseir leil guaxr lol, ni eilmel leil saexl hane zzeze ci. ²⁶ Arbosobo ddei tisir mel sixngexlbbex cirdae a sixjibbei zzeze nael ner dae lol nia eine miardal ddei mel dder bbeix: ni Arbosobo middurbbor goxrjia maelmaerjjia leil guaxr saexl ho a mel, yar halae ni ddei goxrjia ddei ni leil koxl gger nia seir.

²⁷ Yel zzirmar, ngo ni leil quex a ni noni dae la: ni bbaehhexhex a bei a ni ddei zuixl mel dax bbe kae gaxzi nia; casolssor mel leil zoxlnixr a yarzi gexrddo mel dax bbe kae gaxzi nia. Eine nga a ni zzazza-soso a dozil arleixr goxr wo ddo piar a," eine bbeix a.

²⁸ Giedae eil zzu maelmaerjjia Nixrbuxljiaxrnixrsar zzirmar oldde leil ddeix a. ²⁹ Ceinir xiubbo goxr ho a, yar Babirluixr zzi gga zzirmar hherggie xi ollele zir leil ssi za dae. ³⁰ Yar bbeix: "Babirluixr zzi vaervaermo eil ddei mel, ngo ddei bbesur nei ngo ddei quexrlxl sser a zi a zzarmar? Ca mel ngo hherggie eil ddei leil mia a mel, ngo leil mi nr ddux lol, i nr du arddollei bbeixleir?" ³¹ Yar ddar eil qir halae bbeix nr jjia seir, merlabbor qiurte ar ddeir bbeix dae a bbeix: "Nixrbuxljiaxrnixrsar zzirmar, ngo ni leil bbeix gger, ni ddei goxr ddei ni ddei nr nga a. ³² Ni leil mel ca mel dax nr hher lol ggaxr teixl gger a mipaerbbae gga yirvu-nilhax mel dax cirgo a hher nia; ni mel niur sael a silbbar zzor nia. Eine sir koxl goxr nia hherdder Muzzirggie Hher Dae Arbosobo mel middurbbor goxrjia mel leil guaxr, yar goxrjia ddei arseir leil guaxr lol niazzer mel dder arseir leil guaxr

lol, ni eilmel leil saexl hane zzezze ci.” ³³ Halcar malmal Nixrbuxl-jiaxrnixrsar dder yar leil ddar bbeix dae mel sael a loxr a. Yar leil ca mel dax nr hher lol ggaxr teixl gger a; yel niur sael a silbbar zzor; ggecir ddei leil lei merlabbor zil ddar zei lei a ddar vicir jjia a; olce mel seir du lei a, zzemar ddei me mel sael a nga; leixrni-saerkur lei seir du lei a, ngax ddei ddeixr mel sael a nga.

Nixrbuxljiaxrnixrsar Zzirmar Arbosobo Leil Bbeixzae Gger

³⁴ Nixrbuxljiaxrnixrsar bbeix: “Sir koxl bbi ho a, ngo oldde taex bil du leil a merlabbor i dae bbeix: ngo tae nor a; ngo Muzzirggie Hher Dae Arbosobo leil i du, arddolcar ci a lei gol dae Arbosobo leil bbeixzae gger, yar leil middux lol.

Yar mel arddolcar ci a leil hazza leil guaxr,
yar ddei goxr ddei mel cirzeix-hanga zza doxr dae.

³⁵ Middurbbor ca maelmaerjjia azo lei nr suax.

Yar merlabbor meixr mel gga nei middurbbor ca mel gga
yar xiar dae mel sael a bei.

Arseir lei yar leixrhher zzei leil bbiur gex dae nr cexr;
arseir lei yar leil ‘Ni azo bei leir?’ biex nr cexr.

³⁶ Ngo tae nor halcar, ngo ddei goxrjia ddei middux xixl, ca mel ngo leil halleix sael a i du xixl, ngo lei halleix sael a middux xixl. Halae ngo dax cirza-hanga zzibbe su nei ngo woxrke vaervaerpor mel lei ngo dax miar zzibbe lei a; ngo yoxl zzirmar bei xixl dae a; bir halleix leil lei quexrlxl vaer. ³⁷ Merlabbor Zzirmar ddei bei dae mel mel maelmaerjjia lei ngazi, halae bbaehhex. Yar col su ca mel leil yixrsixr nr zza lol. Yel eilcar ngo yar leil bbeixzae gger, yar leil i du, yar leil middux lol.”

Boxrsasar Zzirmar Ddei Zzo Qie

5 ¹ Boxrsasar zzirmar yar woxrke vaervaerpor cirdu mo leil qie a zzorci-ddami zzor. Yar yaa dax cirgo a puxrto zzibbaer dda.

² Zzirmar ddei ggegge-sese a dda dae car, ca leil miardal a yarbbor

Nixrbuxljiaxrnixrsar Yiluxlsaler zzi gga Arbosobo ddei xi gga su si lei piu, sae bei teixl lei beizi nei baxlaxr mel vei teixl lei lol, yel yar, yar woxrke vaervaerpor, yar ddei maervulmo, maeryemo mel dax cirgo a hal mel sser a puxrto zzibbaer dda nia eine bbeix. ³ Yel ca mel dder Yiluxlsaler zzi gga Arbosobo ddei xi gga su si lei piu nei sae bei teixl lei beizi nei baxlaxr hal mel vei si lei a, yaa dder hal mel sser a puxrto zzibbaer dda a. ⁴ Yaa mel puxrto zzibbaer ho dda ho, piu, sae, zzir, he, six nei legelbbe bei teixl lei yaa zi dae hal mel leil bbeixzae gger.

⁵ Halcar malmal, neixleixr sael ca leixrhher ar bbor ddux lei a, leixrni sser a zzirmar ddei xi giex gga, de ddei deixrgoxr lu hal dur leil sul vaexr dae a. Zzirmar ddei mel sul vaexr dae leixrhher hal bbor leil mia a dder, ⁶ hoxrseixl lei bixl a; nixmox zzar gexr zildu a laexlaexllaex go a cizixlgex nr taex zzileil zuax gex dae a, zzoxr-bbeix leil hherggar mel lei go teixl si nr sulsul sael a nga a. ⁷ Giedae zzirmar ddei dder worcixl-worni miardal a, saxrmiexrsu, Jialexl-dir su, halae gieisu mel leil ae dil lei lol. Yel yar Babirluixr goxrjia gga ciryoxr-hanga saexl su mel leil bbeix: “Nia arseir sul eilmel zza var, halae azo yilsia a ngo leil bbeix teixl gger lei xie arddeirnga a, yar dder jjiussi yixrsaexr pia darsisi ar xiux veixr dae, leibbei ddei leil sae bei teixl lei xiarlir ar zex ddexr dae a, goxrjia gga vaerzzirpor soler ddei malmal hal ddei bei nia,” eine bbeix a. ⁸ Yel ciryoxr-hanga saexl su hal mel maelmaerjjia ssi gel a i ssi. Nael yaa sul eilmel zza nr var, azo yilsia lei bbeix teixl gger lei nr xie. ⁹ Boxrsa-sar zzirmar ddei gielgiel nixmox zzar gexr zildu a; hoxrseixl lei bixl jjia a. Yar woxrke vaervaerpor mel lei yarzisael murgur.

¹⁰ Zzirmar ddei yarma mel, zzirmar nei yar woxrke vaervaerpor mel biar dae ddar mel leil bbejjiur a dder, yaa zzo zzor ggie ddir a bbeix: “Zzirmar, ni leil cirse-cirsil gol dae lol nia! Ni nixmox zzar gexr nr ssa, hoxrseixl lei bixl jjia gexr mal nr ssa. ¹¹ Ni goxrjia ddei gga mel seirceix-seirmaer Arbosobo ddei Xiu ddei yar dax hher ji dae ca eine ar ddeir zza. Halleix niabbor gol dae seir car, ca eil ddei mel Arbosobo yar leil xiar ci xie lol, jilixr lol, olnolddu lol. Niabbor Nixrbuxljiaxrnixrsar zzirmar yar leil neirisu, saxrmiexrsu, Jialexl-

dir su nei gieisu hal mel ddei vaervaerpor bei lol a mel, ¹² yar ol-nolddu, jilixr, yixrmeix ka dae mel nei zzirdar mel azo yilsa a bbeix teixl lei xie, yarzi saexl sol hal mel lei saexl a nga arddeir a. Yar leil Daxlyirlir mi. Niabbor Nixrbuxljiaxrnixrsar zzirmar yoxl yar leil Boxrtixrsasar eine mi gger. Ni yar leil ae si la, yar ni leil sul eilmel azo yilsa a bbeix teixl gger lei xie.”

Daxlyirlir Lu Leil Vaexr Dae Sul Mel Ddei Yilsa Biar

¹³ Daxlyirlir leil dder zzirmar ddei dax hier mal ci a. Zzirmar ddei yar leil biex a bbeix: “Ni mel dder ngabbor, Yoxrdaxl goxrjia ssu si lei ca mel gga Daxlyirlir mi ca hal ddei nga a ngo? ¹⁴ Ngo bbejjiur a bbeix, ni dax mel seirceix-seirmaer Arbosobo ddei Xiu ddei hher ji dae. Halae Arbosobo ni leil xiar ci xie lol, jilixr lol, ol-nolddu lol bbeix dae mar. ¹⁵ Ngo ciryoxr-hanga saexl su nei saxrmiexrsu mel leil ae si lei a, ngo leil sul eilmel zza gger lol, azo yilsa a bbeix gger lol, nael yaa arseir lei ngo leil bbeix teixl gger lei nr xie. ¹⁶ Ngo bbejjiur a bbeix, ni mel murgurgurmo hal mel bbeix teixl gger lei xie, yarzi saexl sol hal mel lei ni saexl bbeix dae mar. Eilcar ni sul eilmel zza var, halae azo yilsa a ngo leil bbeix teixl gger lei xie arddeirnga a, ni dder jjiussi yixrsaexr pia darsisi arxiux veixr dae, leibbei ddei leil sae bei teixl lei xiarlir ar zex ddexr dae a, goxrjia gga vaerzzirpor soler ddei malmal hal ddei bei nia.”

¹⁷ Daxlyirlir zzirmar ddei leil ddarkoxl a bbeix: “Ni ddei zzaegu ggerlabox mel ni armael dol dae ddo, ni gger dae seirseir mel si leil gger ddo, nael ngo halae ni leil sul eilmel zza gger a, azo yilsa a bbeix teixl gger lei nia. ¹⁸ Zzirmar, Muzzirggie Hher Dae Arboso-bo halleix niabbor Nixrbuxljiaxrnixrsar leil zzirmar bei lol, quexrlixl vaer lol, middux lol, halae ca mel leil yar leil i du lol. ¹⁹ Arbosobo yar leil quexrlixl vaervaer gger a, yel ciryoxr-hanga, circuxr-hanga nei cirza-hanga ddar te su ca mel lei yar leil gexr a lixlix-laexlaex go dae. Yar arseir leil seixl niazzer dder arseir leil seixl; arseir leil gol dae lol niazzer dder arseir leil gol dae lol; arseir leil bei vaer dax lol niazzer dder arseir leil bei vaer dax lol; arseir leil bei ye xixl lol niazzer dder arseir leil bei ye xixl lol. ²⁰ Nael yar olzzae-olvaer, col

zzae col, armael leil yarzisael i mu gger halcar, yar leil dder zzirmar nr bei lol, mi-nr-ddux lol. ²¹ Yar leil mel ca mel dax nr hher lol ggaxr teixl gger, yar nixmox taex lei yirvu-nilhax ddei nixmox sael a loxr a; yar tarlodaex yir dax cirgo a goxr, niur sael a silbbar zzor, merlabbor zil ddar zei lei a, yar leil ddar vicir, hherdder Muzzir-ggie Hher Dae Arbosobo ddei mel middurbbor ca mel ddei goxrjia leil guaxr, yar armael xiar dae ddei dax zox dae a ca leil zzirmar bei lol, yar eilmel leil saexl hane zzeze ci.

²² Boxrsasar, ni mel Nixrbuxljiaxrnixrsar ddei ssor a. Ni cirzahanga eilmel leil saexl ho a bbeixarnar, halae einezeixl col, ²³ Merhhexr ddei Seirpor Arbosobo meixsaer qir leil armael leil i mu gger. Ni ca mel leil miardal a Arbosobo ddei xi gga su si lei beizi nei baxlaxr mel vei teixl lei lol a, ni nei ni woxrke vaervaerpor, ni ddei maervulmo nei maeryemo mel lei hal mel sser a puxrto zzbbaer dda. Ni yoxl mia nr xie, bbejjiur nr xie, azo lei nr saexl, piu, sae, zzir, he, six nei legelbbe bei teixl lei ni zi dae hal mel leil bbeixzae gger. Ni leil olga gger a ni leil gol dae lol su nei ni cirzahanga bei dae mel leil guaxr gger su Arbosobo leil zzael mi-nr-ddux lol. ²⁴ Yel Arbosobo dder leixrhher hal bbor leil cei teixl lei lol a sul eilmel vaexr lol arddeir a.

²⁵ Sul vaexr dae eilmel mel dder: mirnixr, mirnixr, tixrkexllexl, wufaxrexrx. ²⁶ Mirnixr ddei yils mel dder bbeix: Arbosobo ni goxrjia eil ddei ddei zzirmar bei nixixl ddei eine zzeze a nga a suax gger ho a; ²⁷ tixrkexllexl ddei yils mel dder bbeix: ni leil cex gga cex a, cex nr loxr;^q ²⁸ wufaxrexrx ddei yils mel dder bbeix: ni ddei goxrjia ddei mel Arbosobo bbe kae gger a Mardaexl su ca nei Bosi su ca mel leil guaxr lol nia.”

²⁹ Daxlyirlir bbeix jjia ho a, Boxrsasar zzirmar ddei ca leil miardal a, yaa dder Daxlyirlir leil jjiussi yixrsaexr pia darsisi xiux veixr gex gger, leibbei ddei leil sae bei teixl lei xiarlir ar zex ddexr gex gger. Zzirmar ddei yoxl miardal a Daxlyirlir leil goxrjia gga vaerzzirpor soler ddei malmal hal ddei bei lol. ³⁰ Hal cir xixlmei malmal, Babir-

^q5:27 ni leil cex gga cex a, cex nr loxr; Ddar eil qir ddei yils mel dder Arbosobo i dae a, yar bei nr seir, Arbosobo leil i nr du, yel zzirmar bei nr piar.

luixr su^s ddei zzirmar Boxrsasar leil mel si seixl zil gger a. ³¹ Yel Mardaexl su ca Daxlliuxrsixl mi hal ddei mel Babirluixr goxrjia ddei li wo a. Yar zzirmar bei halleix mel qiuxlcei nr koxl loxr a.

Daxlyirlir Hhemar Bbeddur Gga Hher Ji Dae

6 ¹ Giedae Daxlliuxrsixl zzirmar mel yar armael xiar dae ddei dax zox dae a, serzar cirxiu nrzei mo tiur teixl lei a, goxrjia cirddei-lorbba leil guaxr gger lol. ² Yoxl yaa ggaxrne vaerzzirpor soler tiur teixl lei a yaa leil guaxr lol, yel si leil zzirmar ddei leil nr ke lol. Ca eil soler gga mel Daxlyirlir lei ca dae. ³ Yarzi bbesur zza xiu ddei mel Daxlyirlir dax hher ji dae a, yar bir kebal vaerzzirpor mel leil nei serzar mel leil bei seir leixl. Yel zzirmar ddei dder goxrjia cirddei-lorbba lei yar leil guaxr lol niazzir.

⁴ Halcar kebal vaerzzirpor mel nei serzar mel dder yar nomaex ddei leil zo a yar leil goxl niazzir, nael yar mel miar bei a lei koxl-sseiddo, azo bei nr hoxr bei nr goxr, yel yar azo bei nr hoxr zo wo nr xie. ⁵ Ca hal mel dder bbeix: “Niul Daxlyirlir ddei nomaex zo a yar leil goxl niazzir arddeirnga a mel, nrbba dder yar ddei Arbosobo ddei Lixlfaxr gga zo a nga arnar, nr nga a mel zo wo nr ddo.”^t

⁶ Yel yaa dder yo har a zzirmar ddei dax lei a bbeix: “Zzirmar, ni leil cirse-cirsil gol dae lol nia! ⁷ Niul goxrjia ddei gga ni woxrke vaerzzirpor mel, serzar mel, zezar mel, xixlzar mel, halae ni dax cirza-hanga zzibbe su mel zzi dax zzibbe a, ni dixl har dae arseir lei gierbox nr ddo ar ddei miardal la: hherdder socei ni ddei gga ca mel zzirmar ni dax lar qiuxr ddo, ca mel dax, neir mel dax, bbeixsael Arbosobo dax azo lei qiuxr nr ddo. Nr nga a yar leil dder hhemar gejiggie bbeddur ddei gga piar ji gger. ⁸ Zzirmar, eilcar ni leil qiuxr, bei nr ddo dixl har dae eil ddei vaexr zei lei a ni ddei za taex giexl deix a gierbox nr cexr lol, Mardaexl su ca nei Bosi su ca mel ddei

^s5:30 Babirluixr su Arbosobo ddei sul cirberber a ‘Jialexldir su’ eine bbeix. Yilsi ddei ciryoxr sael nga.

^t6:5 Yaa saexl Daxlyirlir Arbosobo ddei Lixlfaxr noni, yel yaa Daxlyirlir leil Arbosobo ddei Lixlfaxr noni a dder, zzirmar miardal dae mel noni nr cexr lol. Eine nga a zzirmar ddei leil gge-nr-se lol.

lixlfaxr dax zox dae a mel gierbox nr ddo.” ⁹ Yel Daxlliuxrsixl zzirmar ddei dder bei nr ddo miardal dae mel leil nei vaexr zei lei ddei leil yar ddei za taex giexl deix gger a.

¹⁰ Daxlyirlir mel miardal dae ddei leil za giexl ho a saexl a dder ake jjixr a. Yar lebbor ddeix a Yiluxlsaler dax mal dae cuaho hal peixl dax cizixl gger dae a, zoxlzoxl sael a cir ni so boxl Arbosobo leil nawo, Arbosobo dax ddar biar.

¹¹ Nael vaervaerpor hal mel cirter lei a, Daxlyirlir yar ddei Arbosobo dax ddar biar dae, qiuxr dae ggie mia a dder ¹² zzirmar ddei dax ssi a, yar bei nr ddo miardal dae ddei leil bbeix du lei a bbeix: “Zzirmar, socei ni ddei gga ca mel zzirmar ni dax lar qiuxr ddo, ca mel dax, neir mel dax, bbeixsael Arbosobo dax azo lei qiuxr nr ddo, nr nga a yar leil dder hhemar geji ggie bbeddur ddei gga piar ji gger, ni doxl nr nga eil ddei leil za giex deix goxr a zzarmar?” Zzirmar ddei ddarkoxl a bbeix: “Nga a mar! Mardaexl su ca nei Bosi su ca mel ddei lixlfaxr dax zox dae a mel gierbox nr ddo.” ¹³ Yaa zzirmar ddei leil bbeix: “Zzirmar, Yoxrdaxl goxrjia ssu si lei ca mel gga Daxlyirlir mel ni miardal dae a za giex deix goxr ddei leil no lei noni meixl nr gger, halae zoxlzoxl sael a cir ni so boxl yar ddei Arbosobo dax ddar biar.” ¹⁴ Zzirmar ddei ddar eilmel bbejjiur a dder zzasol zildu a. Yar Daxlyirlir leil jiuxl niazziir, yel arsaesael yar leil jiuxl teixl lei ddo xiar cixl xiar ge xiar doxr, merni la zzezze xiar ci a. ¹⁵ Ca hal mel yoxl cirter lei a, zzirmar ddei dax bbeix: “Zzirmar, ni saexl nia, Mardaexl su ca nei Bosi su ca mel ddei lixlfaxr mel dax zox dae a mel, zzirmar ddei miardal dae bei nr ddo hal mel nei dixl har dae mel gierbox nr ddo.”

¹⁶ Yel zzirmar ddei miardal a, ca mel dder Daxlyirlir leil hier si lei a, hhemar geji ggie bbeddur ddei gga piar ji gger a. Zzirmar ddei yar leil bbeix: “Ni arddolcar lei visser dae Arbosobo ddei ni leil jiuxl lol nia!” eine bbeix a. ¹⁷ Ca ar mel a legelbbe ar taex bbax si lei a bbeddur ddei ddaexr cir gger a; zzirmar ddei nei vaervaerpor mel yoxl legelbbe taex leil armael ddei za taex giexl deix gger. Yel Daxlyirlir leil faxr dae eil ddei gier-nr-box lol. ¹⁸ Nael hal cir xixlmei zzirmar

ddei yar hherggie xi gga jjixr ci a mel azo lei nr zzor, arseir lei yar leil yoxrcixl bbaex nr gger lei, halae yixrmeixl lei jjiu nr xie.

¹⁹ Giedae cirnehe merteir a qie, zzirmar ddei dder ha du lei a, jiurjiur-maemae hhemar ge ji ggie bbeddur ddei dax ssi. ²⁰ Yar bbeddur ddei dax ssi naer ci ddo jiur a dder, cix a Daxlyirlir leil ae dae a bbeix: “Gol dae Arbosobo leil visser su Daxlyirlir! Ni arddolcar lei visser dae Arbosobo ddei ni leil hhemar mel dax jiuxl teixl teixl lei a?” ²¹ Daxlyirlir zzirmar ddei leil ddarkoxl a bbeix: “Zzirmar, ni leil cirse-cirsil gol dae lol nia! ²² Ngo Arbosobo meixsaer qir leil nr hoxr mel nr bei halae ni meixsaer qir leil lei azo bei nr sir bei nr goxr, yel ngo ddei Arbosobo yar ddei tisir mel leil zi a, hhemar ddei meir mel leil ddaexr cir du lei a ngo leil bei no nr gger lol.” ²³ Zzirmar ddei dder ggese zildu a, ca leil miardal a Daxlyirlir leil bbeddur ddei gga gga lal xixl lei lol, yel Daxlyirlir leil dder bbeddur ddei gga gga lal xixl lei a. Daxlyirlir mel yar ddei Arbosobo leil ddarzzi a, yar ggecir ddei leil cirdoxr lei bei nr no. ²⁴ Zzirmar ddei miardal a, ca mel dder Daxlyirlir leil goxl su ca hal mel leil, yaa ddei maerssor mel leil nei aniux mel leil hier si lei a hhemar ge ji ggie bbeddur ddei gga piar ji gger a. Nael yaa leil bbeddur ddei gga piar zei nr ta seir hhemar mel yaa leil zix gex dae a hherggar lei kexl me gger a. ²⁵ Zzirmar ddei dder xil vaexr a cirgoxr-hanga, circuxr-hanga nei ciryoxr-hanga ddar te su, hherdder cirpiar-hanga hher dae ca mel leil bbeix: “Nia leil daxlgaxl-daxllixl zzaso lol nia! ²⁶ Eilboxl ngo, ngo guaxr dae ca maelmaerjjia leil miardal, nia Daxlyirlir visser dae Arbosobo ddei dax lixlix-laexlaex gexr nia.

Yar mel gol dae Arbosobo ddei nga a;
 yar arddolcar ci a lei gol dae;
 yar ddei goxr ddei mel mier nr var,
 yar zzirmar bei nor nixixl nr zza.

²⁷ Yar ca mel leil jiuxl,
 ca mel ddei pahherggie bei,
 yar merlabbor nei middurbbor lei
 ddoddomo murgurgurmo bei.

Yar Daxlyirlir leil hhemar mel dax jiuxl teixl lei a,”

eine bbeix a.

²⁸ Daxlliuxrsixl zzirmar bei halleix cirdae a Julursixl Bosi su ca mel ddei zzirmar bei zzezze lei, Daxlyirlir mel azo bei lei bei nr cexr ar yoxr nr zza.

Daxlyirlir Meixcir Mia A Cinil Liller Mia

7 ¹ Boxrsasar Babirluixr goxrjia ddei zzirmar bei beil hal cir koxl, Daxlyirlir yixrgguci ddei leil yixr dae a, yixrmeix arddeir ka a Arbosobo yar leil meixcir mia lol a. Yel yar dder yar mia zoxlyoxlyoxl mel vaexr zei lei a.

² Yar bbeix: “Ngo eilmerxixl meixcir mia a, merlabbor li piar jjia lei mersi jia xixl lei a neixvi vaervaer bbe leil jia deix dae ggie mia a. ³ Neixvi gga yarzisael vaer cinil liller ddeix lei a; yaa zzi dax le-nr-sel. ⁴ Ddeix lei beil ddei mel hhemar lesel, zzemar ddei ddoleixr ar zze niar dae. Ngo i doxr dae car malmal, yar ddoleixr zze leil zix teixl gger a; yar leil middur ddei leil ngier du lei lol a, yar qihher nr bbor ca sael a zzalzzar a ngier dae. Yar yoxl ca nixmox ar taex li wo a. ⁵ Yoxl cinil nrnel ddei ddeix lei a bbe! Eil ddei mel cahhe lesel, yar leixrhher nr bbor bil du lei a ngier dae, meir gga nolggerci so ci bil gex dae. Qiurte ar ddeir a yar leil miardal a bbeix: ‘Ha du lei a, hor hanol zzor!’ ⁶ Giedae ngo i dae a yoxl ssixrmomar lesel cinil ar ddei mia a. Yar nolgger leil ngax ddoleixr liller niar dae, halae oldde li taex niar dae. Yar mel quexrlixl li wo a. ⁷ Giedae ngo, ngo eilmerxixl meixcir mia mel leil i doxr dae a yoxl cinil liller ddei leil mia a. Eil ddei mel yarzisael gexrddo, yarzisael sexr, yarzisael wor-ni. Yar mel he ser vaervaermo ar kae ner dae, yar zzorddu mel leil ggorme gger a ixl ji, zzor nr jjia mel leil qihher ddei gga jjiux xiaxr gger. Cinil eil ddei mel xilmeir hal soler le-nr-sel, yar cuxgexdaex cei baex ner dae. ⁸ Ngo cuxgexdaex eilmel leil i doxr dae car, eil cei baex agala gga mel yoxl yelye ar baex ner teixl lei a. Yelye eil baex yar xilmeirbbaer hal so baex leil yarji jiujiu bbex teixl gger a. Eil

baex mel meixddur niar dae. Meixddur mel ca meixddur leiel. Yar halae ddar vaer te meir ar kae niar dae.”

Halcar Tortor Gol Dae Hal Ddei Leil Mia

⁹ “Ngo i doxr dae a,

zzirmar baxrde ar mel dol dae;

halcar tortor dder gol dae hal ddei yar ddei baxrde taex leil
cux dae.

Yar ddei pia mel wor sael a piu;

olce mel nael yame seibeixbeixmo hal mel sael a piu.

Yar ddei baxrde taex nael adoxlle laerlaellaer ddux lei dae;

baxrde taex ddei luixrzi mel nael adoxl herhelher bbiu dae.

¹⁰ Yar dax ajjix sael a adoxl ar gur pe teixl lei dae.

Yar leil visser su mel hormo du nei hormo du zza;

yar dax ngier dae su mel hormo meir nei hormo meir zza.

Yar cux dae a ca mel leil ser du a;

sul mel lei ddaexr kae ho a;

eilmel leil mia a.^u

¹¹ Cinil hal ddei ddei cuxgexdaex yelye baex ddar vaer te dae a, ngo i doxr dae. Ngo i dae car, yar leil seixl zil gger a; ggecir ddei leil bei xiaxr gger a adoxl herhelher bbiu ggie piar ji gger a. ¹² Ke-bal cinil mel ddei quexrlixl mel nael su si a; gol nael gol dae lol seir, hherdder yaa leil dixl gger dae nixixl ddei zzezze gol ci lol.

¹³ Ngo eilmerxixl meixcir mia car, yoxl ca ddei ssor ddei sael a ar ddei mia a:

Yar zico leil ngier dae a lei.

Yar leil mel halcar tortor dder gol dae hal ddei meixsaer qir leil
hier mal.

^u7:10 Yar cux dae a ca mel leil ser du a; sul mel lei ddaexr kae ho a Daxlyirlir mel merlabbor ddei caserggie gga Arbosobo nei tisir leil mia. Halae Arbosobo ca leil ser du a mia.

¹⁴ Arbosobo yar leil quexrlixl zza lol, arseir lei yar leil i du lol, yar leil zzirmar bei lol,
 cirgoxr-hanga, circuxr-hanga nei cirza-hanga ddar te su ca
 mel yar leil visser lol.
 Yar zzirmar bei nor nixixl nr zza,
 yar ddei quexrlixl bei pixl gger nr cexr;
 yar ddei goxr ddei leil bei xiaxr gger nr cexr.”

Daxlyirlir Meixcir Mia Ddei Azo Yilsa Zza Biar

¹⁵ “Ngo nixmox zzar^v yarzi zzasol. Ngo meixcir mia mel ngo leil gexr lol. ¹⁶ Ngo halmaex ngier su ar ddeir dax ssi naer a yar leil eil-mel azo ddarzi biar dae arddeir a biex. Yar dder azo yilsa a ngo leil bbeix gger a bbeix: ¹⁷ ‘Yarzi sael vaer cinil eil liller mel dder middur-bbor zzirmar ddux lei hal liller nga a. ¹⁸ Nael Muzzirggie Hher Dae Arbosobo ddei seirceix-seirmaer cassor-worssor mel goxrjia ddei li wo nia, halae arddolcar ci a lei guaxr doxr dae nia,’ eine bbeix a. ¹⁹ Ngo dder maelele ddeix lei cinil hal ddei azo yilsa a saexl niazzir. Yar hal soler dax le-nr-sel, yarzisael gexrddo, he ser ner dae, zzir ddeixr niar dae. Yar zzorddu mel leil ggorme gger a ixl ji, zzor nr jjia mel leil qihher ddei gga jjiux xiaxr gger. ²⁰ Ngo yoxl yar arsaenga a oldde taex leil cuxgexdaex cei baex ner dae, yoxl yelye ar baex ner teixl dax lei a hal so baex leil bbex teixl gger, halae yelye eil baex meixddur niar dae, ddarvaer te meir ar kae niar dae, yar leil i dae a bir kebal cuxgexdaex mel leil sexr leixl, eilmel azo yilsa a saexl niazzir. ²¹ Ngo i doxr dae a, cuxgexdaex yelye eil baex mel, Arbosobo ddei seirceix-seirmaer cassor-worssor mel dax zaxlddaexr a yaa leil ddaexr leixl gger niazzir dae a. ²² Yar ddaexr doxr dae a halcar tortor gol dae hal ddei lei a, Muzzirggie Hher Dae Arbosobo ddei seirceix-seirmaer cassor-worssor mel leil bbaehhexhhexmo ser lei hane zzezze ddaexr ci. Halcar yaa dder goxrjia ddei leil guaxr zi ci a.

^v7:15 nixmox zzar Yallaxr ddar bbeix “xiu” eine bbeix.

²³ Yar yoxl bbeix: ‘Cinil liller ddei mel dder middurbbor arsaebeilei zza nia goxrjia liller ddei nga a. Goxrjia eil ddei mel kebal goxrjia maelmaerjjia dax lei le-nr-sel. Yar middurbbor maelmaerjjia leil ixl ji nia, halae ggorme gger a, jjiux xiaxr gger nia. ²⁴ Cuxgexdaex hal cei baex ddei yilsil mel dder goxrjia eil ddei gga ddux lei nia zzirmar ceimo nga a. Yaa giedae nael yoxl kebal zzirmar ar ddeir ddux lei nia. Yar mel xilmeir zzirmar hal mel le-nr-sel. Yar zzirmar soler leil bei leixl gger nia. ²⁵ Yar Muzzirggie Hher Dae Arbosobo leil bbeix vuxryixr. Arbosobo ddei cassor-worssor mel leil goxrsol lol nia; yar jiaxni-jiaxxixl nei lixfaxr mel gierbox gger niazzer. Arbosobo ddei cassor-worssor mel leil yar leixrga gga cir koxl, nr koxl, baxr koxl^w jia ji gger nia. ²⁶ Nael merlabbor caserggie hher dae Arbosobo, ti-sir mel nei ca mel cux dae a ser nia. Yar leil quexrlxl nr zza lol nia, yar ddei goxrjia ddei leil bei xiaxr gger nia, cirse-cirsil mier lol nia. ²⁷ Hane ci a mel Muzzirggie Hher Dae Arbosobo yar ddei seirceix-seirmaer cassor-worssor mel leil sexr lol, yaa leil quexrlxl gger a mer woxrke goxrjia maelmaerjjia leil guaxr lol. Yar ddei goxr ddei mel arddolcar ci a lei zza dae. Vaervaerpor hazza lei yar leil visser nia, yar ddar no nia.’

²⁸ Ngo meixcir mia mel hherdder eine zzeze a nga a. Ngo nixmox zzar ssilssil-ssurssur mo hoxrseixl lei bixl jjia a. Nael ngo nixmox zzar xiar ji dae a nar, si leil bbeix nr gger.”

Daxlyirlir Meixcir Mia A Yanolmar Nei Acixlnolmar Mia

8 ¹ Boxrsasar zzirmar bei so koxl hal cir koxl, ngo yoxl meixcir mia a. ² Ngo meixcir mia car, ngo i dae a ngo Yirlaxr mermi Susa zzi gga zzirmar hherggie dax Wulaexr lazzarmo qir leil hher dae. ³ Ngo i dae car, lazzarmo qir leil yanolmar ar ddeir ngier dae ggie mia a. Ya eil ddei mel cuxgexdaex nr baex ner dae. Cuxgexdaex eil nr baex yarzi si, nael zzi dax sisi a nr nga, giedae sael ner teixl lei hal baex hanol si. ⁴ Ngo yanolmar eil ddei xifa, baexrfa, naxrfa piar a gga du mal ggie mia a. Cinil mel lei yar dax bei wor nr xie, halae yar leixrga

^w7:25 cir koxl, nr koxl, baxr koxl Xiboxrlaexr ddar Arbosobo ddei sul ber gga “yixr zaer, ael zaer, baxl zaer” eine bbeix.

gga jiuxl teixl lei xie su lei nr zza. Yar arsae bei niazzir dder arsae bei, olzzae-olvaer col zzae col.

⁵ Ngo eimel azo yilsa a xiar dae a qie, acixlnolmar ar ddeir a xifa piar a gga lei a middurbbor zzarvul-zzarmae lei beix jiax a. Yar beix dae a qihher middur leil toxl nr dae. Yar meixddur zze agala gga mel saexloddoddomo cuxgexdaex ar baex ner dae. ⁶ Yar mel ngo mia a lazzarmo qir leil ngier dae cuxgexdaex nr baex ner dae yanolmar hal ddei dax beix mal. Yar seifu faexfaexmo yar dax du mal. ⁷ Yar beix naer ci a, seifu faexfaexmo yanolmar ddei leil du a cuxgexdaex nr baex du te gger ggie mia a. Yanolmar ddei mel yar dax du wor nr xie. Yar yanolmar ddei leil middur leil du guir le gger a, qihher ddei sser a yar leil jjiux. Arseir lei yanolmar ddei leil yar leixrga gga jiuxl teixl lei nr xie. ⁸ Acixlnolmar eil ddei mel yarzi olvaer yarzi col; nael yar worni zzir halcar malmal yar ddei cuxgexdaex vaervaer baex te a. Te ggie halmaex yoxl saexloddoddomo cuxgexdaex li baex ner teixl lei a; halae cir baex ar piar dor dae. ⁹ Cuxgexdaex eil li baex gga ar baex leil yelye ar baex ner teixl lei a. Eil baex mel naxrfa piar a gga, dofa piar a gga nei mi ddei zaelzaemo halpiar a gga^x daxlgaxl vaer du dax lei a. ¹⁰ Cuxgexdaex eil baex zeixleixr vaer du dax lei a merlabbor meixr mel dax ddeix ci a. Yar meixr nei gie ar mel leil middurbbor piar zeigger a, yaa leil jjiux. ¹¹ Yar halae olzzae-olvaer col zzae col, yar zzirdae a yar merlabbor meixr mel ddei vaervaerpor hherdder Arbosobo dax ciryoxr a nga. Bbecir-bbeni Arbosobo leil zi dae hal mel nr zi lol, Arbosobo ddei xi seirceix-seirmaer gaxzi giex bei naex gger.^y ¹² Yar yarzi gexrddo zuixl bei a,^z yel Arbosobo ddei cassor-worssor mel nei bbecir-bbeni zi dae mel yar leil jia gger

^x8:9 mi ddei zaelzaemo halpiar a gga Mi ddei zaelzaemo eil ddei mel dder Yirsaexllixl goxrjia nga a. Yirsaexllixl goxrjia ddei mel Babirluixr goxrjia ddei xifa piar gga.

^y8:11 Arbosobo ddei xi seirceix-seirmaer gaxzi giex bei naex gger Yar Arbosobo leil i zeig a, Arbosobo leil zi ggigie xi giex gga ddir a, ca mel leil Arbosobo leil nr zi lol.

^z8:12 Yar yarzi gexrddo zuixl bei a Yar Arbosobo ddei xi seirceix-seirmaer gaxzi hal giex gga ngier dae a, yar mel Arbosobo a eine bbeix.

a. Yar Arbosobo ddei ddarzi mel leil i zei. Yar arsaе bei niazzir dder arsaе bei, bei nr cexr lei ar yoxr nr zza.

¹³ Ngo Arbosobo ddei tisir seirceix-seirmaer ar ddei leil ddar bbeix ggіe bbejjiur a. Kebal Arbosobo ddei tisir seirceix-seirmaer ar ddei a yar leil biex a bbeix: “Bbecir-bbeni Arbosobo leil zi dae hal mel nr zi lol, yarzi gexrddo zuixl bei a Arbosobo ddei xi seirceix-seirmaer gaxzi giex bei naex gger, halae Arbosobo ddei xi nei yar ddei cassor-worssor mel leil jjiux doxr, meixcir mia eilmel arsaе sael ar-gielggur nga nia?” ¹⁴ Tisir hal ddei ddarkoxl a bbeix: “Nrdu soxiu (2300) xixl nei nrdu soxiu (2300) nehe nga nia. Eine goxr ho a sael-nei Arbosobo ddei xi seirceix-seirmaer gaxzi giex seibeixbeix a loxr xixl.”

Јiabaerlixl Tisir Meixcir Ddei Azo Yilsі A Biar

¹⁵ Ngo meixcir mia eil ddei azo yilsі a saexl niazzir. Neixleixr sael, ngo xilmeir leil capor lesel ar ddeir ngier dae a. ¹⁶ Ngo yoxl Wulaexr lazzarmo dax ca ddei qiurte ar ddeir bbejjiur a ae dae a bbeix: “Јiabaerlixl, ni ca eil ddei leil yar meixcir mia mel azo yilsі a saexl lol nia,” eine bbeix a. ¹⁷ Yel yar dder ngo ngier dae ggіe lei a. Yar lei ci a, ngo gexr a qiaxrmeix ddei middur ddei leil puxr gex dae a. Yar ngo leil bbeix: “Ca ddei ssor, ni saexl nia! Ni meixcir mia dae eilmel mel nixixl ddei maelele goxr ci a arsaе nga var biar.”

¹⁸ Yar ngo dax ddar biar dae car, ngo middur ddei leil puxr gex dae a yixrmeixl jjiu dae a. Yar ngo leil ta a ngo leil ngier du lei lol. ¹⁹ Yar bbeix: “I ddo a. Ngo ni leil arddolcar Arbosobo seifu faex a ca leil serpaxl a arsaе lerler nga saexl lol nia. Eilmel mel dixl har dae nixixl ddei maelele goxr ci a arsaе nga var biar dae mel nga a. ²⁰ Ni mia cuxgexdaex nr baex ner dae yanolmar hal ddei mel dder Mardaexl goxrјia nei Bosi goxrјia ddei zzirmar a. ²¹ Acixlnolmar hal ddei mel dder Xilaxl goxrјia zzirmar ddei nga a. Yar meixddur zze agala gga saexl ddodomo cuxgexdaex hal baex mel dder ddux lei beil zzirmar ddei nga a. ²² Cuxgexdaex te ho hal baex leil yoxl li baex ner teixl lei a. Hal li baex mel dder goxrјia li goxr leil bbeix arddeir a. Eil li goxr mel xilmeir hal goxr gga ddux lei arddeir a. Nael hal goxr sael

a nr sexr. ²³ Eil li goxr maelele ci a, Arbosobo leil dir su ca mel zuixl neixl zzir hane lo ci a, yarzi gexrddo yarzi jiuxr zzirmar ar ddeir ddux lei nia. ²⁴ Yar yarzi sexr, nael bbesur mel yar ddei nr nga. Yar mel cirza-hanga leil lei beixiaxr-beilaxlceix gger nia. Yar azo bei lei bei nr cexr nr zza, arsae bei niazzir dder arsae bei. Yar yoxl yarzi sexr hal mel leil nei Arbosobo ddei cassor-worssor mel leil bei zil gger nia. ²⁵ Yar mel jiuxr a hazzi fur sexr. Yar olzxae-olvaer col zxae col. Ca mel fa lei nr fadae halcar malmal ca cirke bei zil gger. Yar yoxl zzirmar mel ddei Zzirmar ddei^a leil dir nia. Maelele ci a yar cirdoxr lei nr sexr ca ar ddeir loxr nia. Nael ca mel yar leil loxr lol nr nga. ²⁶ Ni meixcir mia a, nrdu soxiu xixl nei nrdu soxiu nehe ddei gga arsae lerler nga var hal mel mel yarzi a. Halmel mel nixixl ddei maelele goxr ci a arsae nga biar dae mel nga a. Yel ni sul vaexr dae mel leil guaxr gex dae nia,” eine bbeix a.

²⁷ Ngo mel ha lei ha qir-nr-mi zae nr ni sael no a. Ngo no kor a ha du lei a yoxl zzirmar ddei leil miar bei gger dae a. Ngo meixcir mia eilmel leil xiar lei xiar nr ci yarzi gexr; azo yilsa a nr saexl.

Daxlyirlir Arbosobo Dax Ddar Biar

9 ¹ Mardaexl su ca, Yalhasuixrlur ddei ssor Daxlliuxrsixl Jialexl-dir goxrjia ddei zzirmar bei beil hal cir koxl, ² ngo Arbosobo ddei sul jur leil Yihexrhuaxr Yilixlmir xiezi leil ddar bbeix gger goxr mel leil zza car, Yiluxlsaler zzi ddei mel bei xiaxr gger a azo lei nr zza eine sircei koxl xia pixl nia bbeix dae eilmel leil i saexl a.

³ Yel ngo dder zzor lei nr zzor, zzir pia veixr dae a, kurlu gga cux ji dae a, Seirpor Arbosobo dax ddar biar, yar leil qiuxr. ⁴ Ngo, ngo ddei Arbosobo Yihexrhuaxr dax ddar biar, halae zuixl mel cexrssexl a bbeix:

“Ngo ddei Arbosobo Yihexrhuaxr, ni mel vaer zzir ddei nga a; ngo ni leil gexr ni leil i du. Ni, ni leil perniar su, ni miardal dae mel dax bei mae su ca mel leil perniar a seirseir meixl gger, ni yaa dax

^a8:25 Zzirmar mel ddei zzirmar ddei Eil ddei mel dder Arbosobo ddei nga a.

bbeixharzaxr goxr mel bei ci. ⁵ Ngua mel zuixl bei, yarzi larhor hal mel bei, yarzisael gexrddo mel bei, ni leil dir, ni miardal dae mel dax bei nr mae, ni dax ssi nr mae, ni ngua leil guaxr dae a guaxr vu-nr-ssi. ⁶ Halae ni leil visser su xiezi mel ni ddei mi ddei bbeix dae a, ngua ddei zzirmar dax, vaerværpor mel dax, porpor mel dax nei ngua goxrjia ddei gga cassor-worssor maelmaerjjia dax ddar bbeix dae mel leil no-nr-ni. ⁷ Seirpor, ni mel yarzi bbaehhex, eilcar ngua yixrsixr nr zza. Ngua Yoxrdaxl su ca, Yiluxlsaler zzi gga su ca nei naer ggie bbeixsael vimir ggie cirmaex-hanga hher dae Yir-saexllixl su ca mel ni ddei ddar nr no a ni leil de dae a. Yel ni ngua leil ggaxr teixl gger. ⁸ Yihexrhuaxr, ngua nei ngua ddei zzirmar mel, ngua ddei vaerværpor mel, ngua ddei porpor mel zuixl bei a ni leil de dae a; yel ngua yixrsixr nr zza. ⁹ Ngua ddei Seirpor Arbosobo, ni mel ca leil zoxlnixr, ca leil ssoxrsuxl, nael ngua zzael ni leil dir. ¹⁰ Ngua ddei Arbosobo Yihexrhuaxr, ngua ni ddei qiurte ddei leil no nr ni, halae ni ni leil visser su xiezi mel leil sser dae a ngua leil bbeix gger lol Lixlfaxr mel dax lei bei nr mae. ¹¹ Ngua Yirsaexllixl su ca maelmaerjjia lei ni ddei Lixlfaxr no-nr-ni, ni dax bei nr mae, ni ddei qiurte ddei leil no nr ni. Ngua zuixl bei a ni leil de dae a, yel ni leil visser su Moxrxi Lixlfaxr leil vaexr deix dae nr seir hal mel nei ca leil arsae ser nia hal mel ngua oldde leil ddeix a. Eil ddei mel ngua zuixl bei a ni leil de dae a nga arddeir a. ¹² Ni yarzi gexrddo hal mel ngua oldde leil ddeix lol a, Yiluxlsaler zzi ddei bei xiaxr gger a. Ni mer woxrke zzi mel leil faxr a zeixleixr lei Yiluxlsaler zzi ddei leil faxr mel sael a eine larhor faxr nr seix. Eil ddei mel dder ni ngua dax nei ngua leil ser su vaerværpor mel dax bbeix goxr ddei yarzi loxr a. ¹³ Ngua ddei Arbosobo Yihexrhuaxr, ni Moxrxi vaexr dae Lixlfaxr leil zox dae a, yarzi gexrddo eilmel ngua oldde leil ddeix lol a. Nael ngua zzael halae zuixl bei doxr, ni ddei ddarzi mel leil noni nr dil, ngua ddei Arbosobo Yihexrhuaxr, ni ngua leil zoxlnixr la eine nr qiuxr. ¹⁴ Ngua ddei Arbosobo Yihexrhuaxr, ni bei dae hazza lei bbaehhexhhexmo, nael ngua zzael halae ni ddei ddar nr no. Yel Yihexrhuaxr, ni yarzi gexrddo eilmel bei har zaxr a ngua oldde leil ddeix lol a ngua leil faxr. ¹⁵ Seirpor, ngua ddei

Arbosobo, ni halleix ddoddomo bei a, ni ddei cassor-worssor mel leil Aezixr goxrjia gga hier teixl lei a, armael leil middux lol a, eilni zzezze lei middux dae. Ngua zzael zuixl bei a; yarzi gexrddo bei a. ¹⁶ Seirpor, ngua zuixl bei nei ngua ddei porpor mel lei zuixl yarzi larhor bei a, ngua dax goxr naer dae ca mel lei ni ddei Yiluxlsaler zzi ddei leil nei ni ddei cassor-worssor mel leil bbeix vuxryixr, yel ni leil qiuxr, ni ddei bbaehhexhhex mel dax zox dae a, Yiluxlsaler zzi hherdder ni ddei seirceix-seirmaer worga ga leil seifu tor nr faex, tor sir-nr-zzi. ¹⁷ Ngua ddei Arboso, eilcar ni leil qiuxr, ni, ni leil visser su ddei ni dax ddar biar dae nei ni leil qiuxr dae mel leil arleixr noni gger la! Seirpor, ni armael leil weixr a ni ddei xi bei xi axr ho hal giex leil seir lol la! ¹⁸ Ngo ddei Arboso, ni leil qiuxr, ni ngua qiuxr dae mel leil arleixr noni gger la; ngua goxrsol-goxrnaxr goxr dae mel leil nei ni ddei zzi ddei leil arleixr i meixl gger la. Zzi eil ddei leil mel ni ddei mi niar dae. Ngua ni leil qiuxr a mel ngua seirseir bei dae mel leil koxl dae a qiuxr nr nga, ni ngua leil yarzisael zoxlnixr a nga arddeir a. ¹⁹ Ngo ddei Seirpor Arboso, Yiluxlsaler zzi ddei nei Yirsaexllixl su ca mel lei ni ddei a. Yel ni leil qiuxr, ngua qiuxr dae mel leil noni gger la. Ngo ddei Seirpor Arboso, ni leil qiuxr, ngua leil ssoxrsuxl la. Ngo ddei Seirpor Arboso, ni leil qiuxr, ni noni ho a bei ssi; ni armael leil weixr a tor da-nr-wo hor.”

Jiabaerlixl Yoxl Daxryirlir Dax Ddar Biar

²⁰ Ngo Arboso dax ddar biar doxr dae a, ngo ddei zuixl nei ngo dax cirgo su Yirsaexllixl su ca mel ddei zuixl mel cexrssexl doxr dae, ngo Arboso ddei seirceix-seirmaer worga ga leil yar ddei xi giex leil weixr a, ngo ddei Arboso Yihexrhuaxr leil qiuxr doxr dae. ²¹ Mercixl a Arboso leil zi nia halcar, ngo Arboso dax ddar biar dae. Ngo yarzi bei le halcar malmal ngo meixcir mia goxr Jiabaerlixl

ddei mel ngo dax lei a.^b ²² Yar ngo leil mul gger a bbeix: “Daxlyir-lir, eilcar ngo lei a mel, ni leil olnolddu lol, jilixr lol arddeir a. ²³ Ni jiajia Arbosobo dax qiuxr a nga seir dder yar ni leil ddarkoxl ho a. Yar mel ni leil yarzi perniar, yel ngo lei a yar ddei ddar mel ni leil bbeix gger lei. Eilcar ni Arbosobo ni leil ddarkoxl dae mel leil saexl nia, meixcir mia eilmel azo yilsi a saexl nia.”

²⁴ Arbosobo mel ni dax cirgo su ca^c mel leil nei Arbosobo ddei zzi^d ddei leil weixr a, sircei (70) goxl xiqi^e dixl har ho a. Hane ci a mel nia Arbosobo ddei Lixlfaxr dax bei nr mae zuixl mel bei nor a; nia ddei zuixl mel bei jjia, nia ddei zuixl mel bei pixl gger, arddolcar lei bbaehhexhhex a nga lol. Yel meixcir mia mel arsaе mia mel arsaе nga lol, Arbosobo ddei xiezi arsaе bbeix goxr mel arsaе nga lol, halae Arbosobo ddei xi seirceix-seirmaer gaxzi giex leil ssuvi mei deix.^f ²⁵ Yel ni saexl nia, noni wo xie nia, Yiluxlsaler zzi ddei zi box miardal teixl lei cirdae a, Arbosobo tiur teixl lei ssuvi dox deix gger zzirmar ddei ssor hal ddei lei zzeze ci a mel, sir (7) goxl xiqi nei qiuxlcei nr (62) goxl xiqi^g goxr nia. Yarzi goxrsol halgielggur gga mel Yiluxlsaler zzi gga zzijiul nei zzi dax laxiur maelmaerjjia bei box nia. ²⁶ Qiuxlcei nr (62) goxl xiqi^h goxr ho a mel, Arbosobo tiur teixl lei ssuvi dox deix gger hal ddei leil seixl zil gger nia; azo lei

^b9:21 Ngo yarzi bei lel halcar malmal ngo meixcir mia goxr Jiabaerlixl ddei mel ngo dax lei a. Arbosobo ddei Sul cirberber bbeix: “Halcar malmal halleix ngo meixcir mia goxr Jiabaerlixl ddei mel ggerggelgger ngo dax bbiu mal lei a,” eine bbeix.

^c9:24 ni dax cirgo su ca mel Ca eilmel mel hherdder Yirsaexllixl su ca mel nga a.

^d9:24 Arbosobo ddei zzi Zzi eil ddei mel dder Yiluxlsaler zzi ddei nga a.

^e9:24 70 goxl xiqi Arbosobo ddei sul ber saexl su ca cirke a zzirdae a eil ddei mel dder 490 koxl.

^f9:24 Arbosobo ddei xi seirceix-seirmaer gaxzi giex leil ssuvi mei deix. Ddar eil qir ddei yilsi mel dder Arbosobo ddei xi seirceix-seirmaer gaxzi giex leil seibeix lol a Arbosobo leil zi cexr.

^g9:25 7 goxl xiqi nei 62 goxl xiqi Arbosobo ddei sul ber saexl su ca cirke a zzirdae a eil ddei mel dder 69 hherdder 483 koxl.

^h9:26 Qiuxlcei nr goxl xiqi goxr Arbosobo ddei sul ber saexl su ca cirke a zzirdae a eil ddei mel dder 434 koxl.

nr zza loxr nia. Arddolcar lei nia vaerværpor hal te ddei cassor-worssor mel, zzi eil ddei leil nei Arbosobo ddei xi giex leil bei xiaxr gger lei nia. Maelele ci a mel hherdder worpe-vilax pe mal lei sael a nga: zaxlddaexr doxr nia, cirza-hanga lei bei xiaxr jjia gger nia dixl har dae ho a.²⁷ Vaerværpor hal te mel cassor-worssor mel dax cir goxl xiqiⁱ bbeixharzaxr nia,^j nael cir goxl xiqi ddei cir peix goxr ho a mel, yar dder ca mel leil Arbosobo leil zilabox nr zi lol, kebal zzaegu nr gger lol. Halcar ci a, cirza-hanga bei xiaxr gger su yarzi vuxlsuxrddo hal te Arbosobo ddei xi gga lei a Arbosobo leil bbeix vuxryixr a,^k Arbosobo yar leil nr bei lol dixl har dae hane zzeze ci.^l

Daxlyirlir Dirgerlirsi Lazzarmo Qir Leil Meixcir Mia

10¹ Julursixl Bosi goxrjia ddei zzirmar bei so koxl hal cir koxl, Arbosobo yoxl Daxlyirlir hherdder Boxrtixrsasar leil Arbosobo ddei ddar saexl lol. Ddar eil ddei mel yarzi a. Arddolcar a zaxl vaervær ddaexr mel leil bbeix dae arddeir a. Daxlyirlir Arbosobo yar dax ddar biar dae mel leil saexl, meixcir mia mel leil lei saexl.

² Daxlyirlir bbeix: “Halgielggur ngo mel so goxl xiqi cix doxr a.
³ Ngo zzorciddo mel lei nr zzor, horhor-zzizzi lei nr zzor nr dda, ggecir ddei leil lei nerxiuxiu ssuvi mel nr mei eine so goxl xiqi goxr a.

⁴ Guxlsixlxu nrzei li cir ni, ngo Dirgerlirsi lazzarmo vaervær zex qir leil ngier dae car, ⁵ ngo merlabbor i dae a, zzir pia naxrcixlcixl veixr dae nei Wufaxr mermi ddei sae bei teixl lei maelsael neixl dae ca ar ddeir ngier dae ggie mia a. ⁶ Yar ggecir ddei mel ibeiddo

ⁱ9:27 cir goxl xiqi Arbosobo ddei sul ber saexl su ca cirke a zzirdae a eil ddei mel dder 7 koxl.

^j9:27 Vaerværpor hal te mel cassor-worssor mel dax cir goxl xiqi bbeix har zaxr nia Arbosobo ddei sul ber saexl su cirmelmel zzirdae a Qirsixlluxl Sul 6-19 zul gga cir goxl xiqi eil ddei leil biar dae.

^k9:27 cirza-hanga bei xiaxr gger su yarzi vuxlsuxrddo hal te Arbosobo ddei xi gga lei a Arbosobo leil bbeix vuxryixr a Ca eil te mel Arbosobo ddei xi seirceix-seirmaer gaxzi hal giex gga ngier dae a yar mel Arbosobo a eine bbeix.

^l9:27 Martaexl Sul 24:15 leil lei biar dae.

balsixr nixbaexbaex hal mel sael a nga, qiaxrmeix ddei nael almer bbiexr mel sael a nga, meixddur zze nael adoxlze sael a nga, leixr-hher nei qihher mel nael zzir bbobbolbbo hal mel sael a bbo, ddar-biar dae qiurte ddei nael yarzi vaer, ca seirseil arke a cirter a ae dae sael a nga. ⁷ Meixcir eil ddei mel ngo cirmuzil lar mia. Ngo dax cirgo a kebal ca hal mel nr mia, nael yaa halae gexr zil du a lixlix-laexlaex beix du si a pa hher du lei a. ⁸ Yel ngo cirmuzil a hher dae a. Ngo meixcir murgurgurmo eil ddei leil mia a ceirceilceir loxr a. Hoxrseixl lei gexr bixl jjia a; cingge-circir lei wor cirdoxr lei nr ni ar ddeir loxr a. ⁹ Ngo yar ddar biar dae qiurte ddei leil bbejjiur a dder middur ddei leil puxr gex dae a, yixrmeixl jjiu dae a.

¹⁰ Neixleixr sael leixrhher arbbor a ngo leil ta gex dae a, ngo leil cizixlgex nei leixrkata ddei lixlix-laexlaex middur ddei leil dox gex dae a ardoxr ha du lei lol a ¹¹ Yar ngo leil bbeix: ‘Arbosobo perniar dae Daxlyirlir, eilcar ngo leil miardal si lei a ni dax eilmaex lei lol, yel ngo ni dax ddar biar dae mel ni saexl nia, ni ngier du lei nia,’ eine bbeix a. Yar ngo dax ddar eil qir biar a, ngo dder gexrgexr-zizi mo ngier du lei a. ¹² Yel yar yoxl bbeix: ‘Daxlyirlir, ni Arbosobo meixsaer qir leil armael leil nr col lol nei zabbar-seilseir a Arbosobo dax ni meixcir mia eilmel azo yilsa a ni leil saexl lol la qiuxr beil hal cir ni cirdae, Arbosobo dder ni qiuxr dae mel leil no ni ho a. Ngo lei a mel ni Arbosobo dax ddar biar a lei arddeir a. Yel ni gexr nr ssa! ¹³ Nael ngo Bosi goxrjia ddei zzirmar mel dax hher dae car, Bosi goxrjia leil guaxr su tisir nr seir hal te^m ngo leil bbiur gex dae a, ngo leil nrzei cir ni dawo a. Giedae tisir seirseir mel ddei vaerzzirpor mel gga Mirjialexlⁿ ddei mel ngo leil beijjiu lei a. ¹⁴ Ni meixcir mia eilmel mel, nixixl ddei arsae lerler goxr nia hal mel leil bbeix dae arddeir a. Yel eilcar ngo lei a mel ni leil nixixl maelele ci a, ni armael ddei goxrjia gga cassor-worssor mel arsae lerler pex

^m10:13 Bosi goxrjia leil guaxr su tisir nr seir hal te Yar mel dder Sardaxl leil miar bei gger su tisir nr seir mel gga ar te a.

ⁿ10:13 tisir seirseir mel ddei vaerzzirpor mel gga Mirjialexl Mirjialexl mel dder Yirsaexllixl goxrjia leil guaxr su tisir ddei nga a. Yar mel Arbosobo leil miar bei gger su tisir vaervaerpor seirseir arddeir a. Daxlyirlir Sul 12:1 leil i ssi.

dae var bbeix gger lei arddeir a.’ ¹⁵ Yar ngo dax ddar eilmel biar dae car, ngo dder qiaxrmeix ddei middur leil puxr gex dae a, ddar lei biar teixl lei nr xie a. ¹⁶ Xiar lei xiar nr ci, ca ddei ssor lesel ar ddeir a ngo meirlaexgel ddei leil ta lei a! Yel ngo dder ngo xilmeir ngier dae hal ddei dax ddar te du lei a bbeix: ‘Ngo ddei seirpor! Ngo meixcir eilmel mia a yarzisael cix, cirdoxr lei wor-nr-ni. ¹⁷ Ngo mel seirpor ni leil miar bei gger su a nga, ngo arsae ni dax ddar biar piar bbeixleir? Ngo meixcir eilmel mia a eilcar cingge-circir lei wor-nr-ni seixl lei ho qir-nr-mi.’

¹⁸ Capor lesel ar ddeir a yoxl ngo leil ta a, ngo leil worni du lei lol a. ¹⁹ Yar bbeix: ‘Arbosobo perniar dae ca, ni gexr nr ssa, Arbosobo leil ni leil nixmox zzaso lol nia, ni hhel nia!’ Yar ngo dax ddar biar a qie ngo dder worni du lei a. Yel ngo bbeix: ‘Seirpor, ni ngo leil worni du lei lol a, eilboxl ni bbeix ddo a.’ ²⁰ Yar dder bbeix: ‘Eilboxl ngo jjixr a Bosi goxrjia leil guaxr su tisir nr seir te dax zaxlddaexr jjixr nia. Ngo ssi ho a Xilaxl goxrjia leil guaxr su tisir nr seir te^o dder lei du a. Nael ngo arsaenga a eilmaex lei ni saexl saexl? ²¹ Ngo lei a mel ddarzi vaexr dae sul hal ber leil biar dae mel ni leil bbeix gger lei arddeir a. Nia leil guaxr su tisir Mirjialexl nr nga a mel, arseir **11** lei ngo leil beijjiu su nr zza.’ ” ¹ Yar yoxl bbeix: “Daxlliuxr-sixl Mardaexl su ddei zzirmar bei beil hal cir koxl, ngo mel Mirjialexl leil beijjiu a, yar leil hhel du lei lol a.”

Naxrfa Piar A Gga Nei Baexrfa Piar A Gga Ddei Zzirmar Zaxlddaexr

² “Eilboxl ngo ddarzi mel ni leil bbeix gger: Bosi goxrjia ddei gga mel halae zzirmar soler ddux lei nia. Zzirmar liller ddei nael bir ke-bal zzirmar leil lei be leixl. Yar mel be a yarzi sexr ar ddeir loxr a. Yel yar cassor-worssor mel leil co a Xilaxl goxrjia leil ddaexr ssi lol nia. ³ Nael Xilaxl goxrjia ddei gga yoxl yarzi sexr zzirmar ar ddeir ddux lei nia. Yar mel quexrlixl yarzi vaer, arsae bei niazir arsae bei. ⁴ Yar yarzisael sexr halcar, yar ddei goxrjia ddei mel bbe kae a, mer woxrke li piar gga bbe mal nia. Yar giedae ca mel lei yar dirtu

^o10:20 Xilaxl goxrjia leil guaxr su tisir nr seir te Yar mel dder Sardaxl leil miar bei gger su tisir nr seir mel gga ar te a.

zzirmar bei wo nr ddo. Yar ddei goxrjia ddei lei kebal ca mel guaxr lei nia, yar guaxr dae halleix zzi nr zza.

⁵ Naxrfa piar a gga ddei zzirmar ddei mel sexr nia, nael yar hier dae vaervaerpor mel gga bir yar leil lei sexr leixl ar ddeir ddux lei nia. Yar zzirmar bei, yar quexrlixl yarzisael vaer. ⁶ Giedae nr koxl sael goxr ho a, naxrfa piar a gga zzirmar ddei mel yar ssormaer ddei leil baexrfa piar a gga zzirmar ddei leil fu gger a, yaa nrmel dder cir piar a bei nia. Nael yaa quexrlixl nr zza a bei mae si nr var. Ssormaer hal ddei leil nei yar dax mae dae su mel leil, yarbbor leil, halae halcar yar leil beijjiu su ddei leil vur pixl gger nia. ⁷ Ssormaer eil ddei giedae ca mel gga yoxl capor ssor ar ddeir ddux lei a, zzirmar bei nia. Yar mel meixr hier dae a baexrfa piar a gga meixr mel dax zaxlddaexr. Yar zzirmar ddei hherggie ddir a, yaa leil ddaexr leixl gger nia. ⁸ Halae yaa zi dae bbex nei piu, sae bei teixl lei azo lerler ji ddu hal mel su si a, Aezixr goxrjia jjixr nia. Giedae zae nr koxl sael gga lei yar baexrfa piar a gga zzirmar ddei leil nr ddaexr ssi. ⁹ Baexrfa piar a gga zzirmar ddei mel naxrfa piar a gga zzirmar ddei leil ddaexr lei nia, nael yar hherggie jjixr nia.

¹⁰ Baexrfa piar a gga zzirmar ddei ssor mel zaxlddaexr niazzir a, meixr seirseil ar cir ae pex zaxr dae nia. Meixr eilmel mel worpevilax pe mal lei sael a naxrfa piar a gga zzirmar hherggie ddaexr mal nia. ¹¹ Naxrfa piar a gga zzirmar ddei dder seifu faex a baexrfa piar a gga zzirmar ddei leil ddaexr ssi. Baexrfa piar a gga zzirmar ddei meixr seirseil ar ke ae pex du lei nia, nael naxrfa piar a gga zzirmar ddei yar leil ddaexr leixl gger nia. ¹² Yar leil ddaexr leixl gger ho a, naxrfa piar a gga zzirmar ddei dder yarzi col; yar ca cir meir ddaexr zil gger bbeixarnar, nael yar ddaexr leixl doxr nr var.

¹³ Baexrfa piar a gga zzirmar ddei yoxl bir xilmeir halboxl leil miur, meixr seirseil ar ke ae pex du lei nia. Nr koxl sael goxr ho a, yar dder meixr mel leil hier dae nei zaxlddaexr ddu zzaegu cirke vei dae a lei nia. ¹⁴ Hane ci a, ca cirke a mel naxrfa piar a gga zzirmar ddei leil ddaexr ssi nia; halae ni ddei goxrjia gga zi deil meixr ca hal mel lei naxrfa piar a gga zzirmar ddei leil ddaexr ssi a, yel ni meixcir mia hal mel yarzi loxr lol nia. Nael ca eilmel ddaexr wor nr xie. ¹⁵ Baexr-

fa piar a gga zzirmar ddei lei nia, yar zzi weixrqiaxr maelleil worga ssor sael a zaxlddaexr ddu ar mel bei a, zzi yarzi ver hal ddei leil ddaexr. Naxrfa piar a gga ddei meixr mel arsaebeilei ddaexr wor nr xie; hherdder meixr mel gga tiur teixl lei yarzi sexr hal mel lei ddaexr wor nr xie. ¹⁶ Yar leil ddaexr lei su baexrfa piar a gga zzirmar ddei arsaе bei niazzir arsaе bei. Arseir lei yar dax ddaexr wor nr xie. Yar mel middei yarzi igax zae ddei gga hher dae a, middei hal ddei leil bei xiaxr gger quexrlixl zza.

¹⁷ Baexrfa piar a gga ddei zzirmar ddei yar goxrjia ddei wor maelmaerjjia sser a lei niazzir. Yar hoba naxrfa piar a gga ddei zzirmar dax tor xixl a, armael ddei ssormaer ddei leil naxrfa piar a gga zzirmar ddei maerssor bei lol a, naxrfa piar a gga goxr ddei leil bei xiaxr gger niazzir, nael yar xiar dae ddei bei nr cexr, yar armael dax lei azo seirggiebbær nr zza. ¹⁸ Giedae yar yoxl neixvi qir leil goxr dae ca mel dax ddaexr a, ca hormo su si lei nia. Nael yarzi sexr vaervaerpor ar ddei ddux lei a, yar si leil bbeix vuxryixr dae mel nr bbeix lol. Yar si leil bbeix vuxryixr dae mel yar oldde leil ddeix lol nia. ¹⁹ Yel yar dder yar mermi zzi yarzi ver ddei gga ddir jjixr nia, nael ca mel yar leil bei leixl gger a, seixl zil gger nia.

²⁰ Ca ar ddei a yar dirtu zzirmar bei lei nia. Zzirmar eil ddei mel yar goxrjia ddei leil be dax lol niazzir a, cassor-worssor mel leil ddoddo-nrddo suix cirke sax lol. Nael hormo ardae nr nga dder yar leil bei zil gger nia. Seifu faex a bei zil gger nr nga, zaxlddaexr a ddaexr zil nr nga,” eine bbeix a.

Baexrfa Piar A Gga Yarzi Duxr Zzirmar Ddei

²¹ Ca ddei ssor lesel hal ddei yoxl ngo leil bbeix gger a bbeix: “Yarzi sael duxr ca ar ddei a yar dirtu zzirmar bei nia. Yar mel zzirmar ddei ssor nr nga, yar zzirmar bei quexrlixl nr zza. Yar ca mel zzi dax toltor a nga halcar malmal ddar noni zaezae cirke bbeix a, zzirmar bei wo nia. ²² Yar, ajjix pe mal lei a cirza-hanga leil pe pixl gger sael a, kebal goxrjia ddei meixr mel leil ddaexr leixl gaxzi gger. Yar ca mel dax bbeixharzaxr su vaervaerpor ddei leil lei ddaexr leixl gger. ²³ Yar kebal zzirmar dax cir piar a bei ho a dder ca fur nia.

Yar dax cir piar a bei su mel nganiul bbeixarnar, sexr du lei nia. ²⁴Ca mel zzi dax toltor a nga halcar malmal, yar middei naxrcixl ggie ssi a, yar ddei porpor mel bei lei bei nr seix hal mel bei nia, hherdder halmaex ca mel leil ddaexr leixl gger nia. Yaa dax su si lei cirza-hanga zzaegu mel yar woxrke ca mel leil bbe gger nia. Yar yoxl arsae ddaexr a sael zzi yarzi ver mel leil ddaexr zei ddo xiar dae, nael yar eine bei dae eilmel mel bei mae si nr var.

²⁵Baexrfa piar a gga zzirmar ddei meixr seirseil arke hier dae a, yar ddei wor mel sser a nixmox vaervaermo naxrfa piar a gga zzirmar ddei leil ddaexr ssi nia. Naxrfa piar a gga zzirmar ddei lei meixr yarzi sexr yarzi miur ar cir hier dae a yar leil ddaexr koxl xixl nia. Nael ca mel yar leil ke a^p yar baexrfa piar a gga zzirmar ddei dax ddaexr wor nr xie. ²⁶Yar dax cirgo a zzo zzor su ca mel yar leil bei leixl gger nia; yar ddei meixr mel leil ddaexr leixl gger nia, halae cirke ddaexr zil gger nia. ²⁷Zzirmar eil nrnel jjia lei nixmox zzar nr seir xiar ji dae a, cirgo a zzo zzor, zzicarzzi leil fur nia. Nael dixl har dae nixixl maelele ddei nr ci seir a mel, yaa xiar dae mel sael a nga nr var. ²⁸Baexrfa piar a gga zzirmar ddei mel zzaegu naxrcixl-cixl cirke su si a yar armael ddei goxrjia gga jjixr nia. Yar Arbosobo seirceix-seirmaer bbeixharzaxr dae mel leil dir. Yar arsae bei nia-zzir arsae bei, yel yar armael goxrjia gga jjixr.

²⁹Dixl har dae nixixl ddei ci a, baexrfa piar a gga zzirmar ddei yoxl jjixr lei a zeixleixr naxrfa piar a gga goxrjia ddei leil ddaexr nia. Eil-boxl nael xilmeir halboxl le-nr-sel, giedae lei le-nr-sel. ³⁰Zitixr su ca mel cuaxr zzi dae a yar leil ddaexr lei nia, yel yar gexr a dder jjixr. Yar sirzzi a Arbosobo seirceix-seirmaer bbeixharzaxr dae mel leil dir. Yar Arbosobo bbeixharzaxr dae mel leil no nr ni su ca mel ddei ddarno. ³¹Yar meixr mel leil ae pex du lei a, yaa leil Arbosobo ddei xi giex leil hherdder ca mel pahher ggie bei vuxryixr lol. Yaa Arbosobo leil zi su mel bbecir-bbeni Arbosobo leil zi dae mel nr zi lol, halae yarzi vuxryixrddo bei a, Arbosobo ddei xi giex bei naex gger. ³²Yar mel, Arbosobo bbeixharzaxr dae mel dax bei nr mae su

P11:25 ca mel yar leil ke a Ca mel cirza-hanga baxlfaxr xiar a naxrfa piar a gga zzirmar ddei leil ke a, yar leil ddaexr wor nr xie lol.

ca mel dax ddar noni zaezae cirke bbeix a, yaa leil yarzi gexrddo bei lol; nael Arbosobo leil saexl su cassor-worssor mel vever a Arbosobo dax bei mae dae a, yaa leil bbiur gex dae nia.³³ Cassor-worssor mel gga Arbosobo dax bei mae su hal mel ca cirke leil mul gger nia. Nael yaa hormo nixixl lei altor giedae si, adoxl cu a cu zil, si yaa leil ssu si, yaa ddei zzaegu su si nia.³⁴ Yaa bei wor nr xie car, ca ar mel a yaa leil ardoxr bejjiiu. Ca cirke a nael ddar noni zaezae hal mel te a, yaa dax naer lei nia.³⁵ Arbosobo dax bei mae su mel gga cirmelmel a zuixl bei a mel, Arbosobo yaa ddei nixmox zzar nr seir hal mel bei pixl gger a yaa ddei nixmox ddei seibeixbeix a nga lol, bota ddu nr zza lol, hherdder Arbosobo dixl har dae nixixl maelele ddei zzezze ci.

³⁶ Baexrfa piar a gga zzirmar ddei mel arsae bei niazzir arsae bei. Yar armael leil i mu gger a yar mel bir ca mel zi dae maelmaerjjia leil lei vaer leixl eine bbeix, yoxl ddar murgurgurmo te a vaer zzir Arbosobo leil jiujiu bbeix vuxryixr. Yar mel eine bei doxr dae a Arbosobo sirzzi nor hane zzezze bei ci.⁹ Arbosobo dixl har dae mel arsaebeilei nga var.³⁷ Zzirmar hal ddei mel yar cirza-hanga leil lei vaer leixl eine bbeix. Yel yar porpor mel zi dae mel leil i nr du, ssormaer mel zi ggese dae ddei leil lei i nr du, arseir ddarzzi dae mel leil lei i nr du.³⁸ Doxgoxleixr zzi yarzi ver mel leil guaxr su neir hal te leil zzael i du. Piu, sae, balsixr nei cirza-hanga naxrcixlcixlmo hal mel sser a, yar porpor mel nr saexl neir te leil zi.³⁹ Yar kebal mermi su ca mel zi dae mel leil koxl dae a,^s zzi yarzi ver hal mel leil ddaexr xiaxr gger nia. Ha yar leil ssexl su mel leil yar dder arseir lei yaa leil i du lol a yaa leil middux lol, yaa leil ca cirke leil guaxr lol, halae yaa leil middei bbe gger nia.

⁴⁰ Nixixl ddei maelele ci a, naxrfa piar a gga zzirmar ddei mel baexrfa piar a gga zzirmar ddei dax zaxlddaexr nia. Yel baexrfa piar a gga zzirmar ddei dder marcae nei cuaxr cirke sser, halae mur zzaer su meixr mel leil hier dae a, mersi yarzi vaer jia mal lei

⁹11:36 Qirsixlluxl sul 15:1 leil biar dae.

^s11:39 kebal mermi su ca mel zi dae mel leil koxl dae a Yar Arbosobo leil koxl dae nr nga.

mel sael a naxrfa piar a gga zzirmar ddei dax ddaexr lei. Yar mel worpe-vilax pe mal lei mel sael a goxrjia hormo goxr leil ddaexr ssi nia. ⁴¹Yar middei yarzi igax zae ddei gga lei ddaexr dil ci nia. Ca cirke leil ddaexr leixl gger nia, nael Yirdo su ca, Moxrya su ca nei Yalme su ca mel gga cirke pato xie. ⁴²Yar leixrhher ddei cei teixl a goxrjia hormo leil ddaexr ssi nia, Aezixr goxrjia ddei lei pato nr xie. ⁴³Yar Aezixr goxrjia ddei zzaegu perniarniarmo piu sae bei teixl lei hal mel nei cirza-hanga naxrcixlcixlmo hal mel su si nia. Lilbiryal su ca nei Gursir su ca mel lei yar dax bei mae nia. ⁴⁴Nael dofa nei baexrfa piar a gga ddar ar mel biar teixl lei a zzirmar ddei leil nixmox ddei zzilzzil-zzerzzer mo zza lol a, yar dder seifu faex-faexmo ddux a ca seixl ssi a ca cirke seixl zil gger nia. ⁴⁵Yar mel neixvi nei igax zaezae mo Arbosobo ddei seirceix-seirmaer worga hal ga agala gga, zzirmar hherggie yarzi naxrcixl xigex ar giex bei nia. Nael yar ddei nixixl ddei maelele ci a. Yar leil beijjiu su ca nr zza.”

Yoxl Nixixl Maelele Leil Biar

12 ¹Ca lesel hal ddei yoxl bbeix: “Hane ci a mel, ni dax cir mer-mi su ca mel leil guaxr su tisir vaerzzirpor Mirjialexl ngier du lei nia. Yarzi sael goxrsol goxr nia, goxrjia zza cirdae a eilleix ci a lei, zeixleixr lei eilmel sael a goxrsol nr seix. Ni dax cir mermi su ca mel gga, ha arseir ddei mi ddei olga zza su mel ddei mi vaexr deix dae sul hal jur leil vaexr deix dae a mel, arseir leil dder jiuxl wo ddo. ²Middurzzar nilhar mel gga yixr dae ca cirke a lei zucur nia.^t Cirmelmel a nael arddolcar ci a lei gol dae nia; cirmelmel a nael seixlda nia, arddolcar ci a lei yaa leil vuxryixr doxr nia. ³Arbosobo dax mae dae su ca hal mel mel merlabbor bbo dae mel sael a bbobbolbbo bbo nia; ca mel leil Arbosobo dax bei mae dae lol su hal mel mel, arddolcar ci a lei merlabbor gie mel sael a bbobbolbbo bbo doxr dae nia. ⁴Daxlyirlir, ni ddar eilmel bbeix teixl lei nr ddo, sul eil jur leil zax giexl deix nia, hherdder nixixl ddei maelele goxr

^t12:2 Middurzzar nilhar mel gga yixr dae ca cirke a lei zucur nia. Ddar eil qir ddei yilsi mel dder bbeix: si ho ca cirke a gol du xixl lei nia.

ci hane zzezze. Ca cirke a ssicixl-ssige cirza-hanga zza dax doxr; sul saexl dax var.”

⁵ Ngo i dae a tisir nrmel mia a: cir ddeir a nael lazzarmo eil bbu leil ngier dae, cir ddeir a nael lazzarmo hal bbu leil ngier dae. ⁶ Kebal ar ddei a lazzarmo ajjix ggaxrne ngier dae, zzir pia naxrcixlcixlmo veixr dae hal ddei leil biex a bbeix: “Murgurgurmo eilmel arddolcar saelnei yarzi loxr neil?”

⁷ Ngo, lazzarmo ajjix ggaxrne ngier dae zzir pia veixr dae hal ddei leixrhher nr bbor merlabbor bil du lei a, arddolcar ci a lei gol dae Seirpor ddei leil doxr dae a bbeix zaxr a bbeix: “Cir koxl, nr koxl, baxr koxl goxr a Arbosobo ddei cassor-worssor mel leil deil leixl gger car, eilmel dder yarzi loxr a,” eine bbeix ggie bbejjiur a. ⁸ Ngo ddar eilmel leil bbejjiur a; nael azo yilsa a nr saexl a ngo dder biex a bbeix: “Ngo ddei seirpor, maelele ci a eilmel arsae nga var neil?”

⁹ Yar ddarkoxl a bbeix: “Daxlyirlir, sul eil jur leil zax giexl deix dae ho a; ddar eilmel mel bbeix teixl lei nr ddo, hherdder nixixl ddei maelele ci hane zzezze. Ni ssi a dder ddo a. ¹⁰ Ca seirseil ar ke a zabbar seirseil a Arbosobo miardal dae leiddur mel bei nia, armael leil nixmox ddei seibeixbeix a nga lol nia, bota ddu nr zza lol nia. Nael nixmox neix su hal mel yarzi gexrddo bei zei si nia. Yaa eilmel leil saexl nr var, Arbosobo dax bei mae su ca hal mel lar saexl var. ¹¹ Arbosobo leil zi su mel leil bbecir-bbeni Arbosobo leil zi dae mel nr zi lol, halae yarzi vuxryixrddo bei a, Arbosobo ddei xi giex bei naex gger hane cirdae a, 1290 ni nga nia. ¹² Xia dae a, 1335 ni sser ci xie su ca hal mel, Arbosobo yaa leil ggese lol.

¹³ Daxlyirlir, ni mel si lo zzezze lei ngo leil zabbar-seilseir a ddar-
zzi doxr dae nia. Ni wornol nia.^u Nixixl ddei maelele goxr ci a ni gol du xixl lei a, ni li wo mibbe mel li wo ddo.”

^u12:13 Ni wornol nia Yilsa mel dder ni porpor mel dax ssi nia.